

CARTA JEE NI TEE SAN PABLO APOSTOL NUU ÑAYUU ÑUU ROMA

1 Máá rí cúu Pablo, mozo Jesucristo, chi ni cana Yaā Dios ruhū cúu ri apóstol yā, ni jeni ya ruhū te ni tají yá ruhū jeē nácani ri jnūhun jeē jnáma ya ñayuu.

²Te jnūhun un ní jejnūhun ya nde jenahán ndasí, te yósó núū tútu iī jeē ní catee tēe ni canacani jnūhun ya. ³Te jnūhun un cáhán siquī Jitoho yō Jesucristo, Yaā cúu Sēhe Yaā Dios. Te ni nduu ya tēe, ni cacu ya chiji yucūn rey David. ⁴Te ni natecu yā mēhñu ndíyí ni sáha Espírиту iī, te súcuan ni steén Yaā Dios jeē cúu ya Sēhe ya jeē ndíso poder. ⁵Te jeē jíin Jesucristo ni jēhe Yaā Dios jniñu luu yáha jeē cácuu ri apóstol, cájica ri jíin jnúhun Cristo, návāha coo ñayuu tācá nación jeē candíje i jeē sáha ya jehē i, te cuatáhú i nuū yā. ⁶Te suni máá ró jijnáhan ró, suni ni cana ya rohó ní quívicoo ró ndaha Jesucristo.

⁷Te tēe ri carta yáha cuajeē nuū rohó ñáyuu ñuu Roma. Chi ni cundáhú ni Yaā Dios rohó, te ni cana ya rohó jēe coo ndoo coo iī ró nuū yā. Te ñúhun ni rī jeē maá Tátá yō Yaā Dios jíin Jitoho yō Jesucristo sáha ga yā jeē váha róhó, te sáha ya jeē coo ndeyí coo siī ni rō.

Jeē cuní Pablo quihīn de ñuu Roma

⁸Te xihna gā cástūhun rí nuū rō jeē nácuatáhú rí nuū Yaā Dios jeē siquí rohó jijnáhan ró, chi ni sáha Jesucristo jeē váha róhó. Chi ní ñáyívi jíte núu jnūhun cuahān ndese vāha cácandíje ró yá. ⁹Te máá Yaā Dios jiní yā jeē niní jícan tahú rī jehē rō jijnáhan ró nuū jícan tahú rī. Chi yōhyo ndíhví ni rī jejníñu ri nuū yā jeē nácani ri jnūhun Sēhe ya. ¹⁰Te níni jícan tahú rī nuū yā jeē núu cúní yā te nde vijna te cuu jecondēhe rí rohó. ¹¹Chi cúu ni rī coto ri nuū rō jijnáhan ró, te steén gā rī jnūhun ya nuū rō, návāha quendōo vāha ga anuá rō te cuiñi nihin ga rō jíin. ¹²Súcuan cúní rī návāha sáha yó jéé ínuú coo ndeyí ni yō jijnáhan yó siquí jeē ínuú cácandíje yó yá.

¹³Hermano jijnáhan ró, cúní rī jeē na jécūhun ni rō jeē tǐjni jínu ni cuu ni rī jecondēhe rí rohó, te nde vijna ná tu cuu. Chi cúní rī scuiteé núu ga rī jnūhun ya mēhñu ró, nájñūhun ni sáha ri mēhñu ñáyuu tāca gá nación. ¹⁴Chi cúu ri tēe táu siquí jnúhun ya, chi táu rī nacuāha ri jnūhun ya nuū ndíhi ñayuu, cúu

ñayuu jiní gā siquī ndihí jeē iyó ñayivi jíin jéé tu jíin cuiti, cúu ñayuu tūhva jíin jéé tú tūhva. ¹⁵Jeē yúcuán cúu jeē ndihví ni rí jeē suni nuū rohó ñayuu ñuu Roma nacani rí jñuhun jnáma ya yohó.

Jeē ndíso jñuhun vāha ya poder

¹⁶Chi tu cúcanu rí siquī jñuhun vāha ya, chi yúcuán cúu poder Yaā Dios jeē jnáma ya tāca ñayuu cácanđije, xihna gā ñayuu hebreo te suni tāca gá ñayuu. ¹⁷Chi jñuhun vāha ya un stéén nuū yō jeē ndáhva Yaā Dios cuēchi yó síquī jeē candlje yó jéé sáha ya jehē yō, te máá jéé candlje yó ní cuāhān yō. Chi súcuán cáhān nuū tútu ii: Ñayuu jeē ní ndahva yā cuēchi i, técu i jeē candlje i jeē sáha ya jehē i, áhí.

Siquī jeē iyó ndasí cuéchi ñayuu

¹⁸Chi jíin vāha yó jéé Yaā Dios andiví, cuāha ya castigo xeēn nuū tāca ñayuu tu cácanđije te máni cuēchi cásáha. Chi jíin jñiñu néé cásáha i te cájesi i nuū jñuhun ndaā. ¹⁹Te ma cúu cahān i jeē tu jécūhun ni i siquī ndese Yaā cúu Yaā Dios, chi máá yá ni steén nuū i. ²⁰Chi jíin tāca jeē ni sáha ya te cúu jécūhun ni ñayuu ndese Yaā cúu máá Yaā tu jító i nuū. Chi nde ni jecōo ñayivi jíin ndé vijna te cúu jécūhun vāha ni i jeē máá yá cúu Yaā Dios te iyó poder yā ní cáni. Te jeē yúcuán má cúu cuiti cahān i jeē tu jíin i jeē iyó yá. ²¹Chi vēsú ni cajini i ndese Yaā cúu ya, te tu ní cáchiñúhún i ya jeē cúu ya Yaā Dios, te ni tu ní nácuatáhú i nuū yā. Chi sa suhva ni nduu i ñayuu cájeni cāhá ni, chi ni candunéé íi i, te ni quendōo nee ini

anuá i. ²²Cácahān i jeē ndichí i, te sa suhva cácanéé i. ²³Chi ni castóo i Yaā Dios jeē yóhoyo luu cújéhnu, jeē ma cúu cuiti. Te ni cajetáhú i tāca imagen jeē casáha i, jeē cāa nájnūhun tēe cájihí, te suni nde imagen saa jíin cóo jíin quiti cájica ndicúun ndaha.

²⁴Te jeē yúcuán ní siaá Yaā Dios i jeē na sáha i tāca jñiñu jnéhén jñiñu néé jéé cuní i. Te cásáha i jñiñu néé jíin jnáhan i jeē cúu máá jñuhun canu. ²⁵Chi tu ní cácanđije i jñuhun ndaā Yaā Dios, chi sa ni cacandlje i jñuhun stáhú. Te cáhiyo yíñúhún i te cáchiñúhún i nuū tāca jéé ni sáha ya, lugar jeē chiñúhún i máá Yaā ni sáha ún, Yaā jeē cánuú cahān yō jeē cújéhnu ya níí cáni. Amén.

²⁶Jeē yúcuán ní siaá Yaā Dios i jeē na sáha i tāca jñiñu néé jéé cándiyo ni i jeē cúu máá jñuhun canu. Chi nde ñahan ni casama ña modo síhí, te ni quívi ña jíin modo neé. ²⁷Te suni súcuán tēe ni casiáá de modo chíjñiñu jíin ñahan. Te nde ni nduquijí de ni casáha ndiyí de jíin jnáhan yíí de, te tēe jíin tēe ni casáha de jñiñu jñuhun canu. Te cándoho de castigo siquī jñiñu néé ní casáha de.

²⁸Te jeē tu ní cácuni i cuajnúhún i Yaā Dios, jeē yúcuán ní siaá yā i jeē na cáni néé ni i, te sáha i tāca jñiñu jeē tu iyó váha. ²⁹Te máni máá na jñiñu jeē tu iyó ndaā cándihví ni, te cájica jnéni, cásáha jñiñu néé, cándiyo ni, cájito uhū jnáhan. Te máni jeē cácuésún ni, cájehni ndiyí, cájehnáhan, cástáhú, cásáhuhū jnáhan, cásájnúhún siquī jnáhan. ³⁰Cácahān jñuhun néé

síquī jnáhan, cájito uhū Yaā Dios, cácujeē ni, cásándúxí máá, cásátéyí máá, cájequin costumbre neé, tu cájendetū nuū tatá nuū naná. ³¹Te tu cájecūhun cuiti ni, tu squícu jnūhun jéjnūhun, tu íyó mání jíin jnáhan, tu íne cáhnu ni nuū jnáhan, tu cúndáhú ni jnáhan. ³²Te je cájini vāha i jeē ni sándaā Yaā Dios jeē ñáyuu casáha súcuan, cánuú jnahnū ndetū i. Te vēsú súcuan cájini i, te níní casáha i jniñu neé un, te suni cánujnahan ni i jeē casáha jnáhan i súcuan.

Ndaā sándaā Yaā Dios síquī cuēchi

2 Núu súcuan te róhó jéē cahán cuēchi síquī jnáhan, núu na-ni ñáyuu cúu ró, ma cúu cahán rō jeē tú na cuēchi máá ró. Chi jeē cahán rō cuēchi síquī jnáhan ró cúu jeē ndénehen ró cuēchi síquī maá ró. Chi róhó jéē cahán cuēchi, suni súcuan sáha máá ró cuēchi. ²Chi jíiní yō jeē Yaā Dios, ndaā sáha ya jeē ndónnda ya síquī cuēchi ñáyuu casáha súcuan. ³Te róhó jéē cahán cuēchi síquī ñáyuu casáha cuēchi, te suni súcuan sáha máá ró, ¿te á jéni ni rō jeē cácu máá ró quivī ndónnda Yaā Dios síquī cuēchi, chí naún? ⁴¿A cújéē ni rō nuū jnúhun jeē yóhoyo vāha ni Yaā Dios jíin ró, jíin jéē iyó paciencia yā jeē tú yachi cuāha ya castigo nuū rō? ¿Te á tu jécūhun ni rō jeē jnúhun jeē yóhoyo vāha ni yā sáha jeē nácani ni rō síquī cuēchi ró? ⁵Chi nihni ni rō te tu nácani ni rō síquī cuēchi ró. Te jeē yúcuan cáyā gā rō castigo síquī rō quivī sáha Yaā Dios juicio, máá quivī jeē cóo ndijin jeē ndaā sándaā yā síquī cuēchi. ⁶Chi chunaa yā

nuū ná iin ná iin ñáyuu núu ndese jniñu ni casáha i. ⁷Te ñáyuu jeē tu jécuiñī i jeē sáha i jniñu vāha, cuāha ya jnūhun jeē cótecu i níí cáni. Chi ndúcú i quivī i nuū ndujéhnu yíñúhún i, nuū níí cáni cotecu i. ⁸Te quitī ni yā te cuāha ya castigo nuū ñáyuu cujéē ni nuū yā, te cúnihni ni nuū jnúhun ndaā, chi sa nuū jnúhun yacuá yóho jetáhú i. ⁹Te tāca ñáyuu casáha jniñu neé, chi nihni i jnūndóho xeēn te cucuíhyá ndasí ni i, xihna gā ñáyuu hebreo te suni súcuan ñáyuu tāca gá nación. ¹⁰Te sa suhva tāca ñáyuu casáha jniñu vāha, chi quivī i nuū ndujéhnu yíñúhún i, te coo ndeyí coo sīñ ni i, xihna gā ñáyuu hebreo te suni súcuan ñáyuu tāca gá nación.

¹¹Chi Yaā Dios tu sáha ya cuenta ndese cúu iin iin ñáyuu, chi inuú sáha ya jíin i. ¹²Chi tāca ñáyuu jeē casáha cuēchi, vēsú tu cáyihni i chíjī ley jeē ni jéhe ya nuū Moisés, te tu níní ley un te jnahnū ndetū i. Te tāca ñáyuu cáyihni chíjī ley Moisés te casáha cuēchi, jíin ley un sándaā yā cuēchi i. ¹³Chi tu ndáhva Yaā Dios cuēchi ñáyuu jeē maá jéē cúni nahín-ni i jnūhun cáhán ley yā. Chi sa suhva ñáyuu squícu jeē cahán ley yā cúu jeē ndáhva yā cuēchi i. ¹⁴Chi ñáyuu tācá nación jeē tu cánevāha tutu ley jeē ni jéhe ya nuū ñáyuu hebreo, te núu cásquícu máá i ley yā, suu cúu jeē cánevāha i ley yā ini anuá i, vēsú tu cánevāha i tutu ley un. ¹⁵Te súcuan cástéén i jeē jnúhun ndácu ley un chi ñúhun ini anuá i. Te tāca jéē cájeni ni i jíin ánuá i, suu cúu jeē steén nuū i síquī núu ni sáha i cuēchi chí vāha

ni sáha i. ¹⁶Te súcuan coo máá quívī jeē jíin Jesucristo sándaā Yaā Dios siquī tāca jéē tu íyó váha jeē ní cajeni sáhi ní tāca ñáyuu. Súcuan cáhán jñūhun váha ya jeē nácani ri.

**Siquī jeē tu cásquícu ñáyuu
hebreo ley Moisés**

¹⁷Te róhó cácahān rō jeē tée hebreo cácuu ró, te cátenuū rō maá ley Moisés, te cácutéyí ró jeē siquī Yaā Dios. ¹⁸Te cájeni ni rō jeē jíin rō ndese nájnahān ni yā, jíin jéē cúu nácāji váha ró ndé-ni cúu jniñu váha, chi ni cacutūhva ró ley un. ¹⁹Te cájeni ni rō jeē maá ró cácuu tēe stéén ichi Yaā Dios nuū ñáyuu tu cájini cuiti, jíin jéē cúu sáha ró jéē cúndijin ini anuá ñáyuu cájica nájñūhun nuū nēē. ²⁰Te cájeni ni rō jeē cúu stéén rō nuū ñáyuu tú tūhva jñūhun ya, jíin jéē maá ró cácuu maestro nuū ñáyuu tu jécūhun ni. Chi jíin tutu ley yā te cájini rō ndese cúu jñūhun ndíhí jñūhun ndaā, cájeni ni rō. ²¹Núu súcuan te máá ró jeē castéén nuū ñáyuu, ¿te naun tu cástéén rō nuū maá ró? Te máá ró jeē cácahān jeē ma sácúíhná i, ¿te naun cásácúíhná máá ró? ²²Te máá ró jeē cácahān jeē ma cósiquí ndēē i, ¿te naun cásiquí ndēē maá ró? Te máá ró jeē cácahān jeē cácuquini ni rō ídolo, ¿te naun cásácúíhná ró ndajniñu jeē yúcu ini vehe ídolo? ²³Te cácutéyí ró jíin ley Yaā Dios, te vēsú súcuan te cásáha ró jéē cácahān ñáyuu siquī yā, chi tu cásquícu máá ró jñūhun ndácu ley yā ún. ²⁴Chi súcuan yósó núu tútu ii: Ñáyuu tāca gá nación, máni cácahān ndevāha i siquī Yaā

Dios, jeē siquí cuéchi róhó ñáyuu hebreo.

²⁵Te núu cásquícu ró ley Moisés, yūcuán na te níhín jniñu ndije jeē ní canihīn rō jñunī circuncidar. Te núu tu cásquícu ró ley un, te vēsú ni cuu ró circuncidar, te nájñūhun jeē tu ní cúu ró. ²⁶Te tēe tācá nación, núu cásquícu de jniñu ndácu ley un, vēsú tu ní cānihīn de jñunī circuncidar, núu súcuan te nájñūhun ni canihīn de jñunī circuncidar. ²⁷Te tēe jeē tu ní cúu circuncidar yiqui cúñu de, te cásquícu de ley yā, máá de cahān cuéchi siquī rō. Chi tu cásquícu ró, vēsú cánevāha ró tutu ley un, te ni cuu ró circuncidar. ²⁸Chi nasūu jéē cáa ichi síquí iin tēe sáha jeē cúu ndije de tēe hebreo. Te ni nasūu jéē cúu circuncidar yiqui cúñu iin tēe sáha jeē cúu de tēe ndaā. ²⁹Chi sa suhva tēe cúu hebreo ndije, cúu jeē ini anuá de ñūhun jñūhun ndaā. Te tēe cúu circuncidar ndije, chi nde jíin ini jíin ánuá de sáha de jniñu ndaā te nasūu jéē ndíso de jñunī circuncidar jeē cahān ley un cúu. Tēe cándāa súcuan, nasūu ñáyuu cájejnūhún i de, chi máá Yaā Dios.

3 ¿Núu súcuan te na vé iyó gá nuū ñáyuu hebreo jeē quéndō vāha ga i? ¿Te ndé níhín jniñu jeē casáha i circuncidar? ²Vāha ndasí níhín jniñu. Xihna gā nihín jniñu jeē ni jéhe Yaā Dios jñūhun ya nuū maá i. ³Te vēsú sava i tu ní cácandíje, ¿te á suu sáha jeē ma squícu ga Yaā Dios jñūhun ni jejnūhun ya, chí naún? ⁴Tú cuiti jeē súcuan, chi vēsú núu ndíhi ñáyuu castáhú i, te Yaā Dios chi íyó ndāa

yā. Chi suhva yósó nuū tútu ii jeē ni cáhān iin tēe jíin yá:

Cahān ñayuu jeē iyó ndāā ni jíin táca jnúhun cáhān ni,
te cuni i jeē iyó ndāā ní vēsú núu cácahān i siquī ní.

Achí tutu.

⁵Te cácahān sava ñayuu jeē iyó váha jeē sáha yó cuēchi, chí cuēchi yó jéjníñu stéén jeē iyó ndāā Yaā Dios. Núu súcuan ¿te á cuu cahān yō jeē tú váha sáha Yaā Dios jeē jéhe ya castigo núu jéjníñu cuēchi yó súcuan? (Va cáhān-ni nde ri nájnūhun cácahān ñayuu ñayīví.)

⁶Tú cuiti jeē súcuan. Chi núu jeē tú váha sáha Yaā Dios, ¿te ndese cuu sándaā yā cuēchi ñayuu ñayīví?

⁷Te núu jnúhun stáhú cácahān ñayuu jéjníñu stéén jeē yóhoyó cújéhnu Yaā Dios siquī jeē máni cáhān ndaā yā, ¿te á cuu cahān yō jeē tú váha jeē cahān yā jeē cuēchi cúu jeē castáhú i? ⁸Tuú, chí núu jeē súcuan cúu, te cuu cahān yō jeē vetū-ni sáha yó jéé neé návāha quee jeē váha núu. Te sava ñayuu cácahān ndevāha i siquī rī jeē súcuan cástéén rī, te tú ndaā. Ñayuu ún chí iyó váha jeē ndénehen ya cuēchi siquī i.

Ndivii yō iyó cuēchi

⁹Núu súcuan ¿te á váha ga ñayuu cácuu yóhó ñayuu hebreo vēsú inga ñayuu naún? Tú cuiti jeē súcuan. Chí je ni cacahān yō jeē vēsú ñayuu hebreo chí ñayuu tāca gá nación, ndivii yō yíhi chíji cuēchi. ¹⁰Chi suhva cáhān tutu ii:

Tú cuiti na ñayuu ndaā iyó, ni iin i.

¹¹Te tú cuiti ñayuu jécūhun ni iyó,

te tú ni iin i nánducú i Yaā Dios.

¹²Ndihí i ni cascuíta i jnúhun ya, te inuú-ni ni castívi ndihí i máá i.

Te tú cuiti ñayuu sáha jniñu váha iyó, ni iin i.

¹³Yaū sucūn i cúu nájnūhun yaū ndīyi jeē núne, chí máni jnúhun stáhú cácahān i.

Te nájnūhun veneno coō yíhi yuhu i,

¹⁴chí máni máá jnúhun ndevāha jnúhun uvuā cácahān i.

¹⁵Te yóhoyó ñama jehē i jeē cáhni i ndīyi.

¹⁶Te ndé-ni cúu-ni nuū cájica i te squívi i jnúndóho jeē jnahnú ndetū ñayuu.

¹⁷Te tu cájica cuiti i jíin jnúhun coyūcu máni i,

¹⁸te ni tu cánacani ni i jeē cónso iyo i nuū Yaā Dios.

Achí tutu.

¹⁹Te jíni yō jeē tāca jnúhun cáhān ley jenahān, chí cáhān nuū ñayuu yíhi chíji ley un, návāha ndihí i ma cúu cahān i jehē i. Chi ndenehen Yaā Dios cuēchi siquī i nde jíin ñayuu ní ñayīví. ²⁰Chí tú ni iin ñayuu quendōo ndaā i nuū yā jeē nducú i squícu i jniñu ndácu ley un. Chí ley un jéjníñu máni návāha cuni yō jeē iyó cuēchi yó.

Jeē jnáma ya yohó síquī jeē candíje yó jéé sáha ya jehē yō

²¹Te vijna te je cájini váha yó ndese ndáhva Yaā Dios cuēchi yó. Te nasūu ley un sáha jeē quendōo ndaā yō, vēsú máá tutu ley jíin tēe ni canacani jnúhun ya, ni cacahān ndese ndáhva yā cuēchi ñayuu.

²²Chi tāca ñáyuu jeē cácañdije i jeē ni jíhi Jesucristo jeē chúnaa yā cuēchi i, chi ndahva Yaā Dios cuēchi i siquī jeē súcuan cácañdije i. Chi inuū-ni cúu tācá ndihi ñayuu. ²³Chi ndihi yó ni casáha cuēchi, te jeē yúcuan tu ní cúu quendōo ndaā yō nuū Yaā Dios. ²⁴Te siquī jeē yóhyo vāha ni Yaā Dios, jeē yúcuan ndáhva yā cuēchi yó súcuan-ni. Chi siquī jeē ni jíhi Cristo Jesús cúu jeē jnáma ya yohó. ²⁵Chi Yaā Dios ni jeni ya Cristo návāha socō yā maá yá chunaa yā cuēchi yó jéē ni jíhi yā. Te jnáma ya yohó núu súcuan cácañdije yó. Te súcuan ni sáha Yaā Dios návāha stéén yā jeē Yaā ndaā cúu ya. Chi ichi yátá ni iyo paciencia yā, te tu ní chíhi ya cuenta cuēchi ñayuu. ²⁶Te tiempo yáha stéén yā jeē Yaā ndaā cúu ya, chi ndaā sáha ya jeē squéndōo ndaā yā ñayuu candije vēsú iyó cuēchi i, chi cácañdije i jeē ní chunaa Jesús cuēchi i ni ndahva yā.

²⁷Núu súcuan ¿te á cuu cutéyí gá yō siquī maá yó? Ma cúu cuiti, chi ma cúu cutéyí yó cani ni yō jeē vāha squícu yó ley yā. Chi jnáma ya yohó máá síquī jeē candije yó jéē sáha ya jehē yō. ²⁸Núu súcuan te je jíni yō jeē ndáhva Yaā Dios cuēchi yó síquī jeē súcuan cácañdije yó, te nasūu jéē nducú yó squícu yó jéē ndácu ley.

²⁹¿Te á núu maá-ni ñayuu hebreo cúu ya Yaā Dios, chí naún? Tuú, chi suni cúu ya Yaā Dios jeē jnáma ñayuu tāca gá nación. ³⁰Chi iin-ni Yaā Dios iyó, te ndáhva yā cuēchi ñayuu cácañdije jeē ni sáha ya jehē i, cúu ñayuu ndíso jnuni circuncidar, cúu ñayuu jeē tuú. ³¹Te

jeē candije yó jéē jnáma ya yohó, ¿á sáha jeē tuá jíni ñúhún squícu yó ley yā, chí naún? Tú cuiti, chi sa suhva sáha jeē váha ga cuu squícu yó ley yā.

Abraham cúu iin ejemplo nuū yō

4 Núu súcuan ¿te ndese cahān yō siquī tāca jéē ní cuu jíni jíi yō Abraham? ¿Ndese ni ndahvā cuēchi de? ²Nasūu jéē ni sáha máá de cúu jeē ní ndahva Yaā Dios cuēchi de. Chi núu jeē súcuan cúu núu, te cuu cutéyí de jeē vāha ni sáha de. Te tu ní cutéyí de, chi nasūu síquī jeē ni sáha máá de cúu jeē ní ndahva Yaā Dios cuēchi de. ³¿Chi ndese cáhān tutu ii? Cáhān jeē ní candije Abraham jeē sáha ya jeē ni jéjnūhun ya nuū de, te jeē yúcuan ní ndahva yā cuēchi de. ⁴Te iin ñayuu sájniñu, te yāhu i chi nasūu jéē cútahū i cúu, chi jeē chúnaa yō nuū i cúu. ⁵Te jeē jnáma Yaā Dios ñayuu, chi jeē cútahū i cúu. Chi vēsú tu cúu squícu i tācá jniñu vāha, te núu candije i jeē jnáma ya i nuū cuēchi i, yūcuán na te ndahva yā cuēchi i. ⁶Te David suni ni cahān de ndese yóhyo ndetū ñayuu jeē ndáhva Yaā Dios cuēchi i, vēsú tu cúu sáha i ni iin jniñu jeē quéndōo ndaā i nuū yā. ⁷Chi ni cahān de:

Nacā ndetū ñayuu jeē íne cáhnu ni yā nuū jniñu néé ni sáha i, te tu ndénehen ya cuēchi siquī i. ⁸Te nacā ndetū tēe jeē tuá chíhi máá Jítoho yō cuenta cuēchi de.

Achí tutu.

⁹¿Te á máni máá ñayuu squícu ley circuncidar cúu jeē quéndōo ndetū?

¿Chí suni quéndōo ndetū ñayuu jeē tu cúu circuncidar naún? Suni máa i quéndōo ndetū i. Chi je ni cahān yō jeē ní candíje Abraham jeē sáha ya jeē ni jéjnūhun ya, te jeē yúcuan ní ndahva yā cuēchi de. ¹⁰Te ná ni ndahva yā cuēchi de, ¿á je ni cuu de circuncidar, chí ndé ná tuú? Nasūu jéē je ni cuu de circuncidar, chi nde ná tuú. ¹¹Te cuéé gá te ni nihīn de jnūni circuncidar. Te suu ni cuu iin seña, nájnūhun iin sello jeē ní ndahva yā cuēchi de siquī jeē súcuan ni candíje de. Te jeē yúcuan ní cahān yā jeē cuu de jíi nuū tāca ñayuu jeē candíje i jeē sáha ya jehē i, suni nuū ñayuu tu ní cúu circuncidar, chi suni ndahva yā cuēchi máa i. ¹²Te suni cúu de jíi nuū ñayuu ní cuu circuncidar, te nasūu máni jeē ní cuu i circuncidar, chi suni jeē ní jni i ejemplo de. Chi cáncandíje i jeē sáha ya jehē i, nájnūhun ni candíje máa de nde ná tu cuu de circuncidar.

**Núu candíje yó te sáha Yaā
Dios jeē ni jéjnūhun ya**

¹³Chi ni jejnūhun Yaā Dios nuū Abraham jíin núu tāca yúcūn de jeē cuāha ya ní ñáyiví cuu tahū de. Te nasūu síquī jeē ní nducú de squícu de ley yā cúu jeē ní jejnūhun ya un núu de, chi sa suhva siquī jeē ní candíje de jeē ni jéjnūhun ya, te ni ndahva yā cuēchi de. ¹⁴Chi núu jeē máni máa ñayuu nducú squícu ley cúu jeē nihín jeē ni jéjnūhun ya, núu súcuan te cáncandíje cāha yó nuú, te ma nihín jnínu jeē ni jéjnūhun ya ún. ¹⁵Te ley chí sáha jeē nihín ñayuu castigo siquī jeē tu cúu squícu i. Te núu jeē tu ley, te suni

tu na jnūhun stávi ñayuu siquī ley coo núu.

¹⁶Núu súcuan te ni jejnūhun ya jeē sáha ya jeē váha jíin ñayuu siquī jeē candíje i jeē súcuan sáha ya, te jeē cútahū i súcuan-ni cúu. Te jeē ni jéjnūhun ya ún, íyó cutú nuū tāca yúcūn Abraham, te nasūu núu maá-ni ñayuu jeē nducú squícu ley jenahán, chi suni nuū tāca ñayuu cáncandíje nájnūhun ni candíje Abraham. Te súcuan cúu de jíi nuū tāca yó jeē cáncandíje yó. ¹⁷Súcuan ni sáha Yaā Dios chi ni candíje de jeē sáha ya. Chi súcuan cáhán tutu i: Ni jeni ri rohó cuu ró jíi nuū cuehē ndasí ñayuu. Súcuan ni cahān maá Yaā jeē nastécu ndíyi te cáhán yā ndese coo tāca jéē ná tu coo.

¹⁸Te ni candíje de, te ni cocuhun teyí ni de jeē ni jéjnūhun ya jeē coo cuehē yucūn de, vēsú tuá na modo coo sēhe de núu. Te jeē yúcuan ní nduu de jíi nuū cuehē ndasí ñayuu, nájnūhun ni cahān Yaā Dios: Súcuan nducuehē yucūn rō, achí yá jíin de. ¹⁹Te je yajni jinū de ciento cuiyā, te vēsú súcuan te tu ní quénda de nuū jnūhun cáncandíje de, vēsú jiní de jeē maá de jíin ñasihí de Sara je jéhnu ndasí ndíndúu de jeē ma cúu ga coo sēhe de. ²⁰Te tu ní nácani siquí ni de jeē ma cáncandíje ga de jnūhun ní jejnūhun Yaā Dios jeē coo sēhe de. Chi sa suhva ni candíje nihin ga de, te ni nacuatáhu de nuū Yaā Dios. ²¹Chi ni cucáhnu vāha ni de jeē cúu squícu Yaā Dios ndíhi jeē ni jéjnūhun ya. ²²Te jeē yúcuan ní ndahva yā cuēchi de siquī jeē súcuan ni candíje de.

²³Te nasūu máa-ni siquī Abraham cúu jeē yosó núu tútu jeē ní ndahva

yā cuēchi de jeē ní candíje de.

²⁴Chi suni yósó jéē síquí yohó jíjnáhan yó. Chi suni ndáhva yā cuēchi máá yó jéē candíje yó jéē cúu ya Yaā ní nastécu Jitoho yō Jesús. ²⁵Chi ni jihí Jesús jeē chúnaa yā cuēchi yó, te ni natecu yā návaha ndahva Yaā Dios cuēchi yó.

Ndese quéndōo ñayuu jeē ndáhva yā cuēchi

5 Núu súcuan te je ni ndahva Yaā Dios cuēchi yó síquí jeē ní candíje yó jéē sáha ya jehē yō. Te jeē yúcuan ní sáha ya jeē ní ndívi yó núu jnúhun maní yā jíin yó, síquí jeē ni jíhí Jitoho yō Jesucristo jehē yō. ²Chi máá Cristo ni sáha jeē ni quívicoo yó núu Yaā Dios, chi ni sáha ya jeē váha yóhó síquí jeē súcuan cándíje yó. Te cáhiin nihin yó jíin jnúhun jeē sáha ya jeē váha yóhó. Te cúsiñ ni yō chi ñúhun ni yō jeē jíin yō nuū lúu cujéhu yó jíin Yaā Dios. ³Te nasūu máá yáha-ni, chi suni cúsiñ ni yō jeē ndóho yó jnúndóho. Chi jíiní yō jeē maá jnúndóho sáha jeē jéndeýí ni yō. ⁴Te jeē jéndeýí ni yō sáha jeē íje váha yó cuu yó ñáyuu ndaā. Te jeē íje váha yó sáha jeē ñúhun ni yō tāca jéē váha jeē cóo. ⁵Te tāca jéē ñúhun ni yō, chi nihín nahín yó. Chi jnúhun cúndáhú ni Yaā Dios yohó, ni cunuú ini anuá yō, sáha Yaā Dios jeē jíin Espiritu Santo jeē ni jéhe ya nuū yō.

⁶Chi náa ndóho yó jéē ma cúu cuiti jnama yó máá yó, te ni jihí Cristo jehē yohó jéē cúu yó ñáyuu íyó cuéchi. Te ni jihí yā máá quíví jeē jé ni jeni Yaā Dios. ⁷Te yíí cúu jeē cúu ñayuu jehē inga ñayuu,

vésú jehē ñin ñayuu ndaā. Chí sanaa te íyó jínu jeē chúndeýí ni ñin tēe cuu de jehē ñin tēe ndaā váha. ⁸Te máá Cristo chi ni jihí yā jehē yō náa máni cuēchi sáha yó, te súcuan ni steén Yaā Dios jeē cundáhú ni yā yohó. ⁹Te vijna je ni ndahva Yaā Dios cuēchi yó síquí jeē ni jíhí Cristo jehē yō. Núu súcuan te suni jíiní váha yó jéē jnama Cristo yohó núu castigo quií quíví sáha Yaā Dios juicio. ¹⁰Chi náa cúu ga yō enemigo Yaā Dios, te síquí jeē ni jíhí Sēhe ya jehē yō, te ni sáha ya jeē ndívi yó núu jnúhun maní yā jíin yó. Te jeē súcuan ní ndívi yó nuū jnúhun maní yā jíin yó, te suni jíiní váha yó jéē cácu yó síquí jeē técu Cristo, nduú yá jíin yó. ¹¹Te nasūu máá yáha-ni, chi suni cúsiñ ndasí ni yō jíin Yaā Dios síquí jeē ni sáha Jitoho yō Jesucristo jehē yō, chi máá yá ni sáha jeē ní ndívi yó núu jnúhun maní Yaā Dios jíin yó.

Jnúhun Adán jíin jnúhun Cristo

¹²Núu súcuan te jíiní yō jeē ni quíví cuēchi ini ñayívi ní sáha máá ñin-ni tēe Adán. Te jeē síquí cuéchi yúcuan te ni jecōo cuehyí jéhni ñayuu. Te jeē yúcuan cúu jeē jihí ndíhi ñayuu, chi ndíhi i yíhi cuéchi. ¹³Te nde ná tu cuāha ya ley nuū Moisés, te je íyó cuéchi ini ñayívi. Te síquí jeē ná tu coo ley yā, te tu ní chíhi ya cuenta jeē castívi i. ¹⁴Te vésú súcuan te nde tiempo Adán te nde tiempo Moisés ni yíhi ñayuu chíhi cuehyí jeē jéhni i síquí jeē íyó cuéchi i. Chi ni jihí i síquí cuéchi ni casáha máá i, vésú tu ní sáha i jnáhan cuéchi jeē ni sáha Adán jeē ní cuníhni ni de nuū ñin jniñu

ní ndacu ya. Te Adán ni cuu de iin muestra maá Yaā ní quiji cuéé gá.

¹⁵Te jnūhun jeē ni sáha Adán cuēchi, tu quíjnáhan cuíti jíin táhū jeē jnáma Yaā Dios yohó. Chi jeē ni stívi máá iin-ni tēe ún, jeē yúcuán cúu jeē jihí ndíhi yó. Te jnūhun jeē jnáma Yaā Dios yohó cújéhnū ndasí gá, chi siquī jeē ni sáha máá iin-ni tēe Jesucristo cúu jeē súcuán-ni jnáma ya ndíhi ñayuu candíje. ¹⁶Te cuēchi jeē ni sáha máá iin-ni Adán, tu quíjnáhan cuíti jíin jnūhun jeē jnáma Yaā Dios yohó. Chi siquī máá iin-ni cuēchi ún te ni quívicoo ñayuu chíji jnūhun jnahnū ndetū i. Te jnūhun jeē jnáma ya ñayuu, sa suhva sáha jeē súcuán-ni ndáhva yā cuēchi i, vésú yōhyo cuehē cuēchi ni casáha i. ¹⁷Chi siquī jeē ni sáha máá iin-ni tēe Adán cuēchi, te ni nihīn poder cuehyī jéhni ñayuu. Te sa suhva siquī jeē ni jíhī maá iin-ni tēe Jesucristo, te víhyá gā ni nihīn ñayuu maá yá poder jeē cótecu i caca ndaā i jíin yá. Chi ni ndahva yā cuēchi i siquī jeē yóhyo vāha ni yā.

¹⁸Núu súcuán te siquī jeē ni sáha máá iin-ni tēe Adán cuēchi, te ni quívicoo ndíhi ñayuu chíji jnūhun jnahnū ndetū i. Te sa suhva siquī jeē ni sáha máá iin-ni tēe Jesucristo iin jniñu váha ndasí, te ndáhva Yaā Dios cuēchi ndíhi ñayuu te cotecu i níí cáni. ¹⁹Chi siquī jeē tu ní jéndije máá iin-ni tēe, te ni quívicoo cuehē ndasí ñayuu chíji cuēchi. Te suni súcuán siquī jeē ní jendije máá iin-ni tēe Jesucristo, te ndáhva Yaā Dios cuēchi cuehē ndasí ñayuu.

²⁰Te ni jēhe ya ley yā návāha cuni yō jeē cuēhē cuēchi cásáha yó. Te

jeē ní nducuehē cuēchi yó, te víhyá gā cuehē cúu jnūhun jeē váha ni yā jeē íne cáhnu ni yā nuū yō. ²¹Núu súcuán te nájnūhun ni nihīn poder cuehyī jéhni ñayuu siquī jeē iyó cuēchi i, suni súcuán íyó poder jnūhun jeē váha ni yā jíin yó. Chi ndáhva yā cuēchi yó te cotecu yō níí cáni siquī jeē ni jíhī Jitoho yō Jesucristo jehē yō.

Jeē tuá yíhi yó chíji cuēchi chi yíhi yó ndaha Cristo

6 Núu súcuán ¿te ndese cahān yō? ¿A caca ga yō jíin cuéchi návāha víhyá gā sáha ya jeē váha yóhó jéē cóne cáhnu ni yā nuū yō? ²Ma cúu cuíti. Chi nájnūhun je ni jihí yō jeē tuá yíhi yó chíji cuēchi, te ma cúu ga caca yó jíin cuéchi núu súcuán. ³¿A tu cájēcūhun ni rō jeē tāca yó jeē ní jendute yó siquī jeē ni quívi yó ndaha Cristo Jesús, suni ni jendute yó siquī jeē ni quívi yó chíji jnūhun jeē ni jíhī yō jíin yá? ⁴Chi jeē ní jendute yó cúu nájnūhun ni quindūji yó jéē ni jíhī yō jíin yá. Te vijna te cuu caca yó jíin vida jeē jeē ni jéhe ya nuū yō, chi nájnūhun suni ni natecu yō jíin yá. Chi ni natecu yā ni sáha Tátá yā jíin poder jeē cújéhnū ndasí yá.

⁵Chi núu ni cundúú yó jíin yá siquī jnūhun jeē ni jíhī yō jíin yá, te suni súcuán cundúú yó jíin yá siquī jnūhun jeē ní natecu yō jíin yá.

⁶Chi jíní yō jeē ní naa modo maá yó jeē ni jíca yó jíin ichi yátá, chi ni quívi yó núu jnūhun jeē ni jíhī yō jíin Cristo jicā cruz. Te súcuán ni naa modo yō jeē cúu yó mozo nuū cuēchi, návāha tuá cuajniñu yó núu táca jniñu jeē máni cuēchi

cúu. ⁷Chi ñayuu jeē jé ni cajihī, je ni quendacoo i chíji tāca cuéchi. ⁸Te núu je ni jihī yō jíin Cristo, te cándíje yó jéē suni súcuan ni natecu yō jíin yá. ⁹Chi jíin yō jeē ní natecu Cristo, te ma cúu cuiti ga yā, chi cuehyī jéhi yóhó, tuá na vé cúu sáha jíin yá. ¹⁰Chi jeē ni jíhi yā, te iin jínu-ni ni jihī yā jeē siquí cuéchi ñayuu. Te jeē técu yā vijna, chi sáha ya jeē cuní Yaā Dios. ¹¹Te suni súcuan róhó jíináhan ró, sáha ró cuenta jeē nájnūhun ni cajihī rō jeē ní quendacoo ró chíji cuéchi. Te cátecu rō návāha sáha ró jéē cuní Yaā Dios, chi ndúu ró jíin Jítoho yō Cristo Jesús.

¹²Núu súcuan te ma cuáha ga rō jnūhun quihi ró chíji cuéchi jíin yiquí cúnu rō jeē cúu. Chi cuéchi ún stíhvī ni rohó jéē na sáha ró táca jéē ndíyo néé ni rō. ¹³Te ma cuáha ró máá ró cuajníñu ró núu cuéchi jeē cócuu ró jíin jniñu néé. Chi sa suhva cuáha ró máá ró nuū Yaā Dios, te sáha ró cuenta jeē nájnūhun je ni cajihī rō te ni canatecu rō nuū yā. Te cuáha ndihi ró máá ró nuū yā jeē cuajníñu ró núu jniñu ndaā. ¹⁴Chi tuá na poder cuéchi jeē cundeyí jíin ró, chi tuá cáyihī ró chíji ley jenahán, chi sa cáyihī ró chíji jnūhun jeē váha ni yā jíin ró.

Jnūhun mozo jeē steén ndese quéndōo ñayuu cácaandíje

¹⁵¿Ndese sáha yó núu súcuan? ¿A caca ga yō jíin cuéchi siquí jeē tuá yíhi yó chíji ley jenahán, chi sa yíhi yó chíji jnūhun jeē váha ni yā jíin yó? Ma cúu cuiti. ¹⁶Chi cájini rō jeē núu cuáha ró máá ró jeē cuatáhú ró

sájniñu ró núu iin tēe, núu súcuan te cácuu ró mozo nuū téé ún, te cánuú cuandíje ró núu de. Te suni súcuan núu cuáha ró máá ró jeē sáha ró cuéchi, te mozo cuéchi cácuu ró, te cuu rō. Te núu cuatáhú ró nuū maá yá, te mozo yā cácuu ró jéē cáca ndaā rō. ¹⁷Te na cútahū yō nuū Yaā Dios, chi vésú ni cacuu ró mozo nuū cuéchi, te vijna chi nde jíin ini jíin ánuá rō ni cajetáhú ró nuū jnūhun ya jeē ni quívicoo ró núu. ¹⁸Te vijna te je ni nduu libre rō jeē tuá cácuu ró mozo nuū cuéchi, te cájejniñu ró núu jniñu ndaā. ¹⁹(Ni cahān rī iin jnūhun ndese cúu siquí mozo ini ñayívi yáha, chi tu cájecūhun yachī ni rō siquí jnūhun ya.) Núu súcuan te nájnūhun ni cajēhe ró máá ró nde saá jeē ní cajejniñu ró núu tācá jniñu jnéhén jniñu néé, suni súcuan cuáha ró máá ró vijna jeē cuajníñu ró núu jniñu ndaā, návāha coo ndoo coo iī rō nuū Yaā Dios.

²⁰Chi nde náa cácuu ró mozo nuū cuéchi, te tu ní cájejniñu ró núu jniñu ndaā. ²¹¿Te na vé ni canihīn rō siquí cuéchi ni casáha ró un jéē cáccuanu rō vijna sáha? Tú cuiti, chi máá jéē jnahnú ndetū rō níí cáni sáha. ²²Te vijna te je ni canduu libre rō jeē tuá cácuu ró mozo nuū cuéchi, te cájejniñu ró núu Yaā Dios. Te suu sáha jeē quéndōo váha ró, chi cáhiyo ndoo cáhiyo iī rō nuū yā, te nde sandíhī te cotecu rō níí cáni. ²³Chi yāhu jeē nihín ñayuu siquí cuéchi cúu jeē jnahnú ndetū i. Te sa tahū jeē jéhe Yaā Dios cúu jeē cótecu yō níí cáni andiví, siquí jeē ndúu yó jíin Jítoho yō Cristo Jesús.

Jnūhun ñasihí jín yii jeē steén ndese quéndōo ñayuu cácadíje

7 Hermano, je cájini rō ndese cáhán ley yā, te cájini rō jeē yíhi ñayuu chíji ley maá-ni núu técu i ñayivi yáha. ²Te yāha cúu nájnūhun iin ñahan jeē ní quijnáhan, chi cáhán ley jeē yíhi ña ndaha yii ña maá-ni núu técu de. Te núu ni jihí yii ña, te je ni quenda ña chíji ley jeē ní quijnáhan ña jín de. ³Núu súcuan te núu quijnáhan ña jín inga tēe níní técu gā yii ña, te casíquí ndéē ña de. Te núu je ni jihí yii ña, te je ni quenda ña chíji ley un. Te cuu quijnáhan ña jín inga tēe, chi nasūu jéē casíquí ndéē ña núu súcuan.

⁴Te suni súcuan rōhó jínáhan ró, ñání mání, chi ndúú ró jín Cristo. Chi nájnūhun ni cajihí rō jín Cristo, te ni quendacoo ró chíji ley jenahán. Te vijna chi nájnūhun ni quijnáhan ró jín inga, cúu jeē ní quivicoo ró ndaha Cristo, Yaā ni natecu mēhñu ndíyi, návāha cuu sáha ró jniñu váha jeē cuní Yaā Dios. ⁵Chi ná ni cajica yó jín modo maá yó nde saá, te ley un ní sáha jeē ní ndíyo neé ni yō tāca jéē cuní yiquí cúñu yō jeē sáha yó. Te yūcuan ní sáha jeē jnahnú ndetū yō nuú. ⁶Te vijna te je ni quenda yó chíji ley jenahán, chi nájnūhun je ni jihí yō jeē ma nihín gā poder síquī yō. Te súcuan te íyó libre yō jeē cuajniñu yó núu Yaā Dios. Te jica yó jín modo jeé jéē cuní maá Espíritu, chi tuá yíhi yó chíji ley jeē ní tee Moisés jenahán.

Síquī cuēchi jeē ñūhun ini anuá yō

⁷¿Ndese cahán yō núu súcuan? ¿A ley ndíso cuēchi? Tú cuiti jeē

súcuan. Te núu jeē tú ley yā, te ma cúni cuiti rí jeē íyó cuēchi rí. Chi ma cúni rí jeē cuēchi cúu jeē ndíyo ni rí ndajniñu jnáhan rí núu tu ní cáhán ley jeē ma ndíyo ni yō. ⁸Te súcuan ni nihín cuēchi modo cocuu jín rí. Chi síquī jeē ndácu ley jniñu jeē ma sáha yó cuēchi, te ni quejéé ndíyo ni rí sáha rí tāca jéē neé. Te núu jeē tu ley, te suni tú na jnūhun stívi yó síquī ley nuú. ⁹Chi ni íyo tiempo jeē técu rí jeē ná tu jecūhun ni rí jeē cahán ley. Te ná ni quejéé rí jécūhun ni rí jniñu jeē ndácu ley, te ni jecūhun ni rí jeē íyó cuēchi rí, te ni nduu rí nájnūhun ndíyi.

¹⁰Chi ni jini rí jeē ley jeē sáha jeé cótecu anuá rí nuú, te tuú chi sa ni sáha jeé jnahnú ndetū rí nuú. ¹¹Chi jín jéé ndácu ley un jniñu, te ni nihín cuēchi modo cocuu jín rí, te ni stahú ruhū. Chi jín jéé ndácu ley jniñu, te cuēchi ni sáha jeē ní quenda jnūhun jeē jnahnú ndetū rí.

¹²Núu súcuan te íyó ndáa maá ley, te tācá jniñu ndácu chi íyó ndoo íyó ndáa váha. ¹³Núu súcuan te ley jeē íyó váha ún, ¿a suu sáha jeé jnahnú ndetū rí naún? Tú cuiti. Chi sa suhva máa cuēchi cúu jeē sáha jeé jnahnú ndetū rí, te súcuan stúu cuēchi ndese íyó máa. Chi jín jniñu váha jeé ndácu ley te ni natūu jniñu neé jéé cúu cuēchi.

¹⁴Chi jín yō jeē nuú maá Espíritu vēji ley. Te ruhū chi sa névāha rí iin modo neé máa rí jeē ni squivi ruhū jejniñu cāha rí nuú cuēchi. ¹⁵Chi tāca jéé sáha rí, tu jécūhun ni rí najehē cúu jeē sáha rí. Chi jniñu váha jeé cuní rí sáha rí, tu ndé níhín rí fuerza sáha rí, chi sa suhva sáha rí jniñu neé jéé tu cúvāha ni rí sáha

ri. ¹⁶Te náa sáha ri jniñu néé jéé tu cúní rí sáha ri, núu súcuan te nácuni rí jeé iyó ndáa ley. ¹⁷Núu súcuan te nasūu rúhū cúu jeé sáha jniñu néé un, chi modo neé jéé ñúhun ini anuá rí cúu jeé sáha cuéchi. ¹⁸Chi jíni rí jeé modo maá rí jeé névāha ri ini anuá rí, tú cuítí na vé jeé váha íyó. Chi cúní rí sáha ri jniñu váha, te tu ndé níhín rí fuerza sáha ri. ¹⁹Chi jniñu váha jeé cuní rí sáha ri, tu sáha ri. Te jniñu néé jéé tu cúní rí, sa yūcuan sáha ri. ²⁰Te náa sáha ri jniñu jeé tu cúní rí sáha ri, te nasūu rúhū cúu jeé sáha, chi modo neé jéé ñúhun ini anuá rí cúu jeé sáha.

²¹Núu súcuan te ni jini rí jeé súcuan cúu jíni rí: Vēsú cuní rí sáha ri jniñu váha, te sa máni modo neé cúu jeé ñúhun ini anuá rí. ²²Chi cúsíi ni rí jíni ley Yaā Dios nde jíni ini anuá rí. ²³Te ni nacuni rí jeé iyó inga modo neé maá rí jeé jési nuū jeé cuní rí sáha ri jeé váha. Te cúu ri nájnūhun preso nuū cuéchi jeé jícú jíni rí.

²⁴Nacā jeé ndahú gá cúu ri núu súcuan. ¿Ndé ñin jnama ruhū nuū modo neé maá rí jeé jícú jíni rí jeé jnahnú ndetū rí? ²⁵Na cútahū ndasí rí nuū Yaā Dios, chi maá yá cúu jeé jnama ruhū nuū modo neé rí siquī jeé ni jíhi Jitoho rí Jesucristo jehē rí. Núu súcuan te vēsú cuní yō squícu yó ley Yaā Dios, te jeé jíni fuerza maá yó ma cúu, chi modo neé maá yó sáha jeé jejníñu cāha yó nuū cuéchi.

**Siquī jeé jícú yó jíni modo
cuní Espíritu Yaā Dios**

8 Núu súcuan te ma ndénehen
Yaā Dios cuéchi siquī ñayuu

cáyihí ndaha Cristo. Chi tuá cájica i jíni modo neé maá i, chi sa suhva cájica i nájnūhun cúní maá Espíritu yā. ²Chi modo jeé sáha Espíritu cúu jeé técu yō siquī jeé yíhi yó ndaha Cristo Jesús. Te yūcuan ní sáha jeé ní nduu libre yō nuū jnūhun jeé ni yíhi yó chíji cuéchi jeé jnahnú ndetū yō nuú. ³Chi ni sáha Yaā Dios jeé quéndōo váha ñayuu jeé tu ní cúu quendōo váha jíni ley Moisés, siquī jeé tú na fuerza i jíni modo maá i jeé squícu i ley un. Chi ni tají yá Sēhe ya ni quiji, te ni nduu ya nájnūhun ñayuu cáhiyo cuéchi, návāha socō yā maá yá siquī cuéchi, vēsú tú na cuéchi ya. Te súcuan ni ndonda Yaā Dios siquī cuéchi jeé ní casáha ñayuu jíni modo neé maá i. ⁴Súcuan ni cuu návāha cuu squícu yó táca jniñu ndaā jeé ndácu ley, chi tuá jícú yó jíni modo neé maá yó, chi jícú yó nájnūhun cúní maá Espíritu.

⁵Chi ñayuu jeé cájica jíni modo neé maá, chi máni ndíhví ni i siquī jeé cuní maá i. Te ñayuu jeé cájica nájnūhun cúní Espíritu, chi máni ndíhví ni i siquī jniñu cúní maá Espíritu. ⁶Te jeé ndíhví ni yō siquī modo cuní maá yó sáha jeé jnahnú ndetū yō. Te jeé ndíhví ni yō siquī jniñu cúní maá Espíritu, sa suhva sáha jeé cotecu yō níí cáni te coo ndeyí coo síi ni yō. ⁷Chi ñayuu jeé ndíhví ni siquī modo neé cúní maá i, chi jító uhū i Yaā Dios, chi tu cúní i cuatáhú i ley Yaā Dios, te ni ma cúu squícu i. ⁸Jeé yúcuan, ñayuu jícú jíni modo cuní maá, tu cúu sáha i jeé cúsíi ni Yaā Dios jíni i.

⁹Te maá ró jijnáhan ró, chi tuá cájica ró jíni modo cuní maá ró, chi

cájica ró nájñuhun cúní Espíritu, chi ndéé Espíritu Yaā Dios ini anuá rō. Te ñayuu jeē tu ndéé Espíritu Cristo ini i, tu cáyihí i ndaha ya. ¹⁰Te núu ndéé Cristo ini rō, te vēsū iin quivī te cuu yiqui cúñu rō jeē siquī cuēchi, te cotecu anuá rō siquī jeē ní ndahva Yaā Dios cuēchi ró. ¹¹Te núu ini rō jijnáhan ró ndéé Espíritu maá Yaā jeē ní nastécu Cristo Jesús mēhñu ndíyí, yūcuán na te máá yá suni sáha ya jeē natecu yiqui cúñu rō jeē cúū. Te sáha ya súcuan jeē jíin máá Espíritu yá jeē ndeé ini rō.

¹²Núu súcuan, hermano jijnáhan ró, ndéé jniñu yó jéé caca ndaā yō, te nasūu jéé sáha yó modo neé cúní maá yó. ¹³Chi núu caca ró jíin modo neé máá ró, te jnahnū ndetū rō. Te núu jíin fuerza maá Espíritu snáā rō tācá jniñu cásáha ró jíin modo neé máá ró, te cotecu rō níí cáni.

¹⁴Chi tāca ñáyuu jeē cándiquin modo jeē steén Espíritu Yaā Dios, máá i cácuu sēhe Yaā Dios. ¹⁵Chi Espíritu jeē ní canihin rō, tu ní sáha ya rohó jéé cuu ró nájñuhun mozo nuū yā jeē yūhú tucu ró núū yā, chi sa ni sáha ya jeē cúu yó sēhe ya. Te jeē yúcuan cúu jeē cahán jee yó: Tátá maá ná. ¹⁶Te máá Espíritu steén yā ini anuá yō jeē cúu ndije yó sēhe Yaā Dios. ¹⁷Te núu sēhe ya cácuu yó, te suni nihin yō maá táhū jeē ni jéjñuhun ya, te iin cáhnu-ni coo tahū yō jíin Cristo. Chi núu ndóho yó jíin yá vijna, suni cujéhnu yó jíin yá andiví.

¹⁸Núu súcuan te sáha ri cuenta jeē tāca jnúndóho jeē ndóho yó vijna, lúlí ndasí cúu nuū jnúhun

jeē cujéhnu luu yó jíin yá cucuéé gá. ¹⁹Chi ndihí jeē ni jécōo, yōhyo cándetu jeē na sáha Yaā Dios jeē nduvāha, quivī quenda ndijin jeē cujéhnu sēhe Yaā Dios jijnáhan i. ²⁰Chi tāca jéé ni jécōo, chi ni quiví chiji jñuhun jeē tu quéndōo vāha. Te nasūu jéé ní castívi máá, chi ñayuu ni casáha cuēchi, te jeē yúcuan ní squéndōo Yaā Dios súcuan. Te máni cándetu jeē ndúvāha. ²¹Chi iin quiví te tāca jéé ni jécōo, chi quenda chiji jñuhun jeē tívi jíin jéé tehyú. Te nduluu ndasí nájñuhun coo tāca sēhe Yaā Dios, chi cācu nuū jnúhun jeē tu quéndōo vāha. ²²Chi jíin yō jeē tāca jéé ni jécōo, chi nde vijna te nájñuhun inuú-ni cándoho te cájitū ni jeē na ndúvāha ndihí. ²³Te nasūu máá-ni tāca jéé ni jécōo cúu jeē ndóho, chi suni nde maá yó ndóho yó, vēsū je névāha yó Espíritu jeē cúu seña jeē iin quiví te nihin yō ndihí tahū yō. Chi yōhyo ndóho yó jnúndóho, te ndétu yó jéé náquihin sēhe ya yohó te jnama ya yiqui cúñu yō jeē tuá ndoho yó jíin. ²⁴Chi ni jnama ya yohó siquī jeē ñuhun ni yō jeē súcuan coo. Te núu je ni sáha ya nájñuhun ñuhun ni yō, yūcuán na te tuá ñuhun ni yō jeē sáha ya súcuan jíin yó. Chi tuá ndétu yó te núu je ni cuu súcuan. ²⁵Te núu ná tu coto yó jéé sáha ya jeē ñuhun ni yō, yūcuán na te jíin paciencia ndétu yó jéé sáha ya.

²⁶Te suni súcuan máá Espíritu chindéé ñáhán yá yohó jéé tú na fuerza ini yō. Chi tu jíin yō cacán tahú yō nájñuhun cánuú. Te máá Espíritu cahán ndahú yá jíin Yaā Dios jehē yō siquī tāca jéé jitú ndasí

ni yō te tu nín yō jnūhun ndese cacān tahú yō. ²⁷Te máá Yaā Dios jeē jito ndee anuá yō, chí jíní yā tāca jéē cuní maá Espíritu cahān yā jehē yō. Chí ñayuu cáyihí ndaha Yaā Dios, cáhán ndahú Espíritu jehē i nájñuhun cuní Yaā Dios.

Vāha-ni cūndeyí yó siquī ndihí jeneé

²⁸Te jíní yō jeē tācā-ni jeē quíji nuū ñayuu maní jíin Yaā Dios, jeē váha chí jéē uhú, chí quéndōo váha ga i nuū yā, sáha ya jíin táca jéē yúcuān. Chí cácuu i ñayuu jeē ní cana ya i ni quívicoo i ndaha ya siquī jeē súcuān ni tee ni yā nde jenahán. ²⁹Chí nde ná tu coo i te je jíní yā i, te je ni jeni ya i jeē ndoo ndaā nduu ánuá i ndacu i máá Séhe ya, návāha na cúu Séhe ya ñani jéhnū nuū cuehē ñayuu cácuu ñani cácuānje. ³⁰Te jeē ní jeni ya i, te suni ni cana ya i. Te jeē ní cana ya i, te suni ni ndahva yā cuēchi i. Te jeē ní ndahva yā cuēchi i, te suni ni sáha ya jeē cujéhnū i.

³¹¿Te ndese ga cahān yō siquī jnūhun jéhnū yáha núu súcuān? Chí núu íne Yaā Dios jíin yó, ¿te ndé ñin cuu cahān siquī yō? Tú ni ñin. ³²Chí máá yá tu ní jnáma ya Séhe ya jeē ma cúu yā, chí sa suhva ni jēhe ya Séhe ya ni jihí yā jehē ndihí yó. Te núu súcuān ni jēhe ya Séhe ya, te nagā ni cuu jeē ma cuáha ya tāca gá jeē jíiní ñúhún yó. ³³¿Te ndé ñin cuu cahān cuēchi siquī ñayuu jeē ní nacāji Yaā Dios? Tú ni ñin. Chí máá yá ni ndahva yā cuēchi i. ³⁴¿Te ndé ñin cuu ndenehen cuēchi siquī yō núu súcuān? Tú ni ñin. Chí máá Cristo cúu jeē ní jihí yā jehē yō, te suni ni natecu yā. Te vijna te ndéé

yá lado váha Yaā Dios nuū cujéhnū ya, te cáhán ndahú yá jíin Yaā Dios jehē yō. ³⁵¿Te ndé ñin cuu quenehen yóhó núu jnūhun cúndáhú ni Cristo yohó? ¿A jnúndóho, chí táca jéē yíí sáha, chí jéē cájito xeēn ñayuu yohó, chí jnámā, chí jéē cúmaní sahma, chí jnūhun yúhú, chí jéē cáhni i yóhó naún? Ni ñin táca jéē yáha. ³⁶Chí súcuān yósó núu tútu ñi jeē cácahān ñayuu cácuānje jíin Yaā Dios:

Jeē siquí maá ní te ndihí-ni hora cácuu i cahni i sáñá.

Te casáha i jíin ná nájñuhun casáha i jíin lanchi, quití cúu.

Achí tutu. ³⁷Te tuú chí vésú cándoho yó táca jéē yáha, te váha-ni cūndeyí yó siquī ndihí-ni, sáha máá Yaā jeē ní cundáhú ni yohó. ³⁸Jeē yúcuān cúcáhnu ni rí jeē tú ni ñin cuu quenehen yóhó núu jnūhun cúndáhú ni Yaā Dios yohó. Ni núu cuu yō, ni núu cotecu yō, ni táca ndajéhé andiví, ni táca jéē neé jéē cácuajéhnū jnái poder, ni jeē iyó vijna, ni jeē cóo, ³⁹ni jeē iyó núu súcún, ni jeē iyó núu cúnú, ni táca gá jeē ní jecōo, ma cúu cuiti quenehen yóhó núu Yaā Dios, jeē jíin Jítoho yō Cristo Jesús ni cundáhú ni yá yohó.

Siquī ndese ni nacāji ya yucūn Israel

9 Te cáhán ndaā rí chí cúu rí tēe cácuānje Cristo, te tu stáhú rí, te jíin rí ini anuá rí jeē cahān ndaā rí sáha Espíritu Santo. ²Yóhyo cúcuíhyá ni rí, te níiní jnáhuhū ni anuá rí ³jeē siquí táca jnáhan ri ñayuu naciún hebreo, chí ñin-ni yucūn rí jijnáhan ri. Chí jeē siquí máá i te cúu ni rí jeē núu na cúu te

cujiyo ri nuū Cristo te jnahnū ndetū rī, návāha jíin yúcuān te cuu cācu ánuá maá i núú. ⁴Chi cácuu i yucūn ñayuu Israel, te nde jenahán ni sáha Yaā Dios jeē cúu i sēhe ya, te mēhñu vícō jeē ndíndēé ní condee yā jíin i sáá. Te jíin máá i ni sáha ya tācá contrato, te ni jēhe ya ley yā nuū Moisés jeē cúu máá i, te ni steén yā ndese chiñúhún i ya ini templo, te nuū maá i ni jejnūhun ya cuehē jnūhun. ⁵Te máá i cácuu yucūn tāca jíí yō jeē ní cacujéhnu, te suni yucūn maá i ni cacu Cristo jeē ní nduu ya tēe. Te máá yá cúu Yaā Dios jeē jnāi ndihi-ni, te níí cáni cahān ñayuu jeē cujéhnu ya. Amén.

⁶Te nasūu jéé tu ní queé ndaā tāca jnūhun jeē ni jéjnūhun Yaā Dios nuū ñayuu Israel. Chi ni quee ndaā nahín núú vēsú jecu-ni i, chi tú ndihi-ni yucūn Israel cúu jeē cácadíje. ⁷Chi nasūú ndihi yucūn Abraham cácuu ndije sēhe de jeē ni jéjnūhun ya. Chi ni cahān Yaā Dios jíin de: Nuū maá-ni sēhe ró Isaac cúu nuū coo yucūn rō jeē ni jéjnūhun ri nuū rō. ⁸Te jnūhun yáha cúní cahān jeē ni iin ñayuu tu cúu i sēhe Yaā Dios síquī jeē ní cacu i iin yucūn jeē jéni ni i jeē váha ga cúu. Chi sa suhva máni yucūn jeē ni jéjnūhun ya cúu ndije yucūn jeē chíhi ya cuenta. ⁹Chi yāha cúu jnūhun jeē ni jéjnūhun ya nuū Abraham: Máá tiempo jeē ní jeni ri te quiji rī, te cacu iin sēhe yáí ñasihí ró Sara, achí yá.

¹⁰Te nasūu máá yáha-ni, chi suni Rebeca ni cacu uū sēhe yáí ña, te iin-ni tátá ndíndúú i, jeē ní cuu jíí yō Isaac. ¹¹⁻¹³Te nde ná tu cacu ndíndúú i, te ná tu sáha i jeē váha

jeē uhú, te je ni cahān yā jíin Rebeca: Sūchi ní cacu xihna gā cuajniñu i nuū sūchi sándñíhí, achí yá. Chi suni sūcuān cáhán tutu i: Ni jito manī rī Jacob, te Esaú chi tuú, achí Yaā Dios. Te sūcuān jíin yō jeē maá Yaā Dios cuu nacāji ya ñayuu núu ndese tēe ni maá yá, te nasūu síquī jniñu jeē sáha i, chi sa suhva síquī ndese cúní maá yá nacāji ya i.

¹⁴¿Ndese cahān yō núu sūcuān? ¿A jéé tu íyó ndaā Yaā Dios jeē sáha ya sūcuān, chí naún? Tú cuiti. ¹⁵Chi nde jenahán ní cahān yā jíin Moisés: Ndé-ni cúu jeē cuní rī cundáhú ni rī, te cundáhú ni rī. Te ndé-ni cúu jeē cuní rī sáha ri jeē váha jíin, te sáha ri jíin, achí yá. ¹⁶Núu sūcuān te nasūu síquī jeē cuní maá ñayuu, ni nasūu jéé nducú ndéyí máá i cúu, chi síquī ndese cúní maá yá cundáhú ni yā i. ¹⁷Chi suni sūcuān yósó núú tútu ií jeē ni cahān yā jíin rey ñuu Egipto: Ni jeni ri rohó jéé cúu ró rey, návāha jíin rōhó te stéén rī poder rī, te návāha cuitē núu síhví rí níí ñáyiví, achí yá. ¹⁸Núu sūcuān te núu ndé iin cúní yā cundáhú ni yā, te cundáhú ni yā. Te núu ndé iin cúní yā jeē cunihni ni, te sáha ya jeē cunihni ni.

¹⁹Te sanaa te cahān iin ró jíin rí: Núu sūcuān cúu ¿te najehē cahān gā yā jeē cuēchi sáha yó? Chi ma cúu casi yō nuū yā jeē ndese cúní maá yá sáha ya. Achi rō. ²⁰Te sa suhva cáhán rī jíin ró: Róhó, ¿ndé iin cúu ró jéé jéni ni rō stió cuñí rō nuū Yaā Dios? ¿A cuu cahān quísi ñuhun jíin tēe ni sáha: Najehē ni sáha ró rúhū sūcuān? achi. ²¹Chi tēe sáha quísi, cuu sáha de ndese

cúní maá de, chi iin-ni ñuhun cuu sáha de iin quísi fino te inga quísi corriente.

²²¿Te á tu jétáhú ró jeē suni súcuan sáha Yaā Dios jíin ñáyuu? Chi cúní yā steén yā ndese sáha ya juicio siquī ñáyuu, te súcuan te cuni i poder yā. Te vēsú súcuan te ni iyo paciencia ni yā jeē tu ní ndóna yachī yā siquī ñáyuu jeē jnahnú ndetū. ²³Te sáha ya súcuan nāvaha stéén yā ndese yōhyo luu cújéhnu ya siquī jniñu sáha ya jíin yóhó ñáyuu cúndáhú ni yā. Chi nde jenahán je ni sátühva ya yohó jēē luu cújéhnu yó jíin yá. ²⁴Chi ni cana ya yohó jēē candíje yó, te sava yó cúu ñayuu hebreo te sava yó cúu ñayuu tāca gá nación. ²⁵Chi suni súcuan ni cahān yā, yósó núu tútu Oseas:

Ñayuu jeē tu ní cúu ñayuu maá rí, vijna te cahān rī jeē cácuu i ñayuu maá rí.

Te ñayuu jeē tu ní íyo manī rī jíin, vijna te cahān rī jeē cácuu i ñayuu jeē manī rī jíin.

²⁶Te máa lugar nuū ni cáhān rī jeē násū ñáyuu rī cácuu i, suu yūcuan cáhān ñayuu jeē cácuu i sēhe Yaā Dios, Yaā técu níí cáni.

Achí yá. ²⁷Te Isaías sa suhva ni cahān de jñuhun ñayuu Israel: Vēsú ni cayā yucūn Israel nájñuhun ñití yumar, te jecu-ni i jnama ya. ²⁸Chi Jitoho yō Yaā Dios, yachī sínu ya jniñu jeē sándaā yā cuēchi ñayuu ñayiví. Achí tutu. ²⁹Chi nájñuhun ni cahān tucu Isaías:

Máa Yāā cúu Jitoho nuū tāca ndajéhé andiví, núu tu ní jnáma ya jecu yucūn yō nuú,

te je ni ndoho yó nájñuhun ñayuu ñuu Sodoma jíin ñuu Gomorra, jeē ní naa ndihi.

Achí tutu.

Jeē tu cájétáhú ñayuu hebreo jñuhun jnama ya i

³⁰¿Ndeese cahān yō núu súcuan? Suu jeē ñáyuu tāca gá nación, vēsú tu ní cánducú i quendōo ndaā i nuū Yaā Dios, te ni ndahva yā cuēchi i. Chi siquī jeē ní candíje i jeē ni jíhī Cristo jehē i cúu jeē ní ndahva yā cuēchi i. ³¹Te sa suhva ñayuu Israel, vēsú cánducú i quendōo ndaā i nuū Yaā Dios sáha ley yā, te tu cúndeyí i quendōo ndaā i. ³²¿Te najehē? Siquī jeē tu cánducú i jeē ndahva yā cuēchi i jeē candíje i jeē ni jíhī Cristo jehē i, chi sa jéni ni i jeē squícu máa i ley te quendōo ndaā i. Te jeē stívi i súcuan cúu nájñuhun cácotúú i siquī maá yúū jeē cácachihī jehē, te suu cúu Cristo.

³³Chi súcuan cáhān nuū tútu ii:

Nde ñuu rī Sion sáha rī jeē cóne maá Yaā jeē cúu nájñuhun yuū jeē cácachihī i jehē i.

Te cúu ya nájñuhun toto jeē cotúú i sáha.

Te sa suhva ñayuu cáccandíje Yāā ún, chi jnama nahín yá i.

Achí Yāā Dios.

10 Hermano jijnáhan ró, cúu ndasí ni rī te jíicán tahu rī nuū Yaā Dios jehē ñayuu nación rī Israel, jeē na jnáma ya i jíjnáhan i. ²Chi cáhān rī jeē vāha cásáha i jeē ndihví ni i cáchiñúhún i Yāā Dios. Te vēsú súcuan te cáchiñúhún cáhá i. ³Chi tu cájecūhun ni i ndese ndáhva Yaā Dios cuēchi ñayuu, te ndúcú i quendōo ndaā i máa-ni jeē

squícu i ley. Te tu cájetáhú i máá modo jeē ndáhva Yaā Dios cuēchi i. ⁴Chi siquī jeē ni sáha Cristo te cuu quenda ñayuu chíji ley Moisés. Te ndáhva Yaā Dios cuēchi táca ñáyuu jeē candíje i jeē ni sáha Cristo jehē i.

⁵Chi súcuan ni tee Moisés jnūhun ñayuu jeē cánducú quendōo ndaā jíin ley: Núu ñin ñayuu cuu squícu i táca jniñu ndácu ley, te cotecu i núu, áchí. ⁶Te jnūhun jeē ndáhva Yaā Dios cuēchi ñayuu siquī jeē candíje i jeē sáha ya jehē i, chi sa suhva cáhán: Ma cáni ni rō jeē jíni ñúhún caa ró andiví nasnúu ró Cristo jeē ndahva yā cuēchi ró. ⁷Ni ma cáni ni rō jeē jíni ñúhún cuun ró ndé nuū cūnú ndonehen ró Cristo mēhñu ndíyí, nájnūhun jeē tu ní nátecu yā. ⁸¿Te ndese cáhán jnūhun un núu súcuan? Yajni íyó jnúhun ya jíin ró, chi ñúhun ini yuhu ró jíin ini anuá rō, achí tutu. Te suu cúu jnūhun jeē na cándíje yó jéē jnáma ya yohó. Te jnūhun yáha cúu jeē cánacani ri. ⁹Chi núu cahán rō jeē Jítoho rō cúu Jesús, te núu candíje ró jíin ini jíin ánuá rō jeē ní natecu yā mēhñu ndíyí ni sáha Yaā Dios, yūcuán na te jnama ya rohó. ¹⁰Chi jíin ini jíin ánuá yō cándíje yó jéē ni jíhí yā jehē yō, te súcuan te ndáhva Yaā Dios cuēchi yó. Te jeē cahán yō jeē Jítoho yō cúu Jesucristo, te súcuan te jnama ya yohó.

¹¹Chi cáhán tutu i: Táca ñáyuu jeē candíje i ya, chi jnama nahín yá i, áchí. ¹²Chi inuú-ni cúu ñayuu hebreo jíin táca gá ñayuu, chi máá yá cúu Jítoho nuū ndíhi yó, te cuehē jeē váha sáha ya jíin ñáyuu cácahán ndahú jíin yá. ¹³Chi

súcuan cáhán jnūhun ya: Ndíhi ñayuu cácahán ndahú jíin máá Jítoho yō, chi jnama ya i, áchí.

¹⁴¿Te ndese cahán ndahú i jíin yá te núu tu ní cándíje i jeē jnama ya i? ¿Te ndese candíje i te núu tu ní jíni sōho i jnūhun ya? ¿Te ndese cuni sōho i te núu tú na ñayuu nacani jnūhun nuū i? ¹⁵¿Te ndese nacani ñayuu jnūhun ya te núu jeē tu tájí yá i quihín i? Chi nájnūhun cáhán tutu i: Yōhýo luu jniñu cásáha ñayuu cájica jíin jnúhun ndeyí sñi jeē cánacani i jnūhun vāha ya, achí.

¹⁶Te nasúu ndíhi i jétáhú nuū jnúhun jnama ya i. Chi ni cahán Isaías nde jenahán: Tátá Yaā Dios, ¿ndé ñáyuu ni candíje jnūhun jeē cánacani ná víi? áchí de. ¹⁷Núu súcuan te núu cuni nahín ñayuu te cuu candíje i. Te jnūhun cuni nahín i cúu jnūhun Cristo.

¹⁸Te cájnūhun rí: ¿A tu ní cájini sōho i jnūhun un núu súcuan? Tuú chi ni cajini sōho i, chi cáhán tutu i:

Níí ñáyívi ní cajini sōho ñayuu jnūhun jeē ní canacani de.

Te nde nuū jicá gá táca lado ni jinū jnūhun ún.

Achí tutu. ¹⁹Te suni cájnūhun rí: ¿A tu ní cájecūhun ni ñayuu Israel jnūhun ún? Tuú chi ni cajecūhun ni i, te tu ní cájetáhú i. Chi xihna gā Moisés ni cachi de jeē ni cáhán Yaā Dios:

Cucuñí ró jijnáhan ró, chi cuāha ri jnūhun ri nuū inga ñayuu jeē násúu ñin nación cúu.

Te quití ni rō coto ró jéē cuāha ri jnūhun ri nuū ñin nación jeē tu jécūhun ni.

²⁰Te suni Isaías ni chundeyí ni de ni cachi cājí de jeē ni cáhān Yaā Dios:

Ñayuu jeē tu ní cánanducú rúhū, ni cajini i ruhū.

Te nuū ñayuu jeē tu ní cácajnūhún, ni steén rī nuū i ndese Yaā cúu ri.

²¹Te siquī ñayuu Israel sa ni cahān de jeē ni cáhān yā: Ndiquivī ni canari i jeē quívicoo i nuū rī, te tu ní cácu ni i, chi ñayuu nīhni ni, ñayuu jéē ni cácuu i. Achí yá, achí Isaías.

Jeē iyó jecu na ñayuu

Israel jeē jnáma ya

11 Núu súcuan te cájnūhun rí: ¿A ní stóo Yaā Dios ñayuu maá yá Israel, chí naún? Tú cuiti. Chi ruhū suni tēe Israel cúu ri, te yucūn Abraham cúu ri, te Benjamín cúu jí rī jenhán. ²Tu ní stóo Yaā Dios ñayuu maá yá, chi je ni nacāji ya i nde jenhán. ¿A tu cājini rō ndese cáhān tutu ii jnūhun Elías, tēe ni nacani jnūhun ya jenhán? Chi náa jícán tahu de, te ni cahān de siquī ñayuu Israel: ³Tátā Yaā Dios, ni cajehni i tāca tēe cánacani jnūhun ní, te ni cajenu i tācá altar ní. Te máñuhún na sāña ní quendōo, te vijna suni cácu ni i cahni i sāña, áchí de. ⁴Te Yaā Dios ni nastío cuíñí yā: Iyó nahín úxā mil ñayuu cácañdije ruhū jeē tu ní cájecuñí yití i nuū ídolo naní Baal, achí yá. ⁵Te suni súcuan vijna, chí iyó jecu na ñayuu jeē ní nacāji ya siquī jeē váha ni yā jíin i. ⁶Te núu ni nacāji ya i siquī jeē váha ni yā jíin i, te nasūu síquī jeē ni sáha i jniñu váha cúu. Chi núu siquī jeē ni sáha i

jniñu váha cúu, yūcuán na te nasūu síquī jeē váha ni yā cúu.

⁷¿Te ndese cúu núu súcuan?

Cúu jeē ñayuu Israel tu ní cundeyí i quendōo ndaā i nájñūhun ni canducú i. Te sava i jeē ní nacāji ya, chí máá i ni ndahva yā cuēchi i. Te sava ga i ni ndunīhni ni i,

⁸nájñūhun cáhān tutu ii: Ni sáha Yaā Dios jeē tu jécūhun cuiti ni i siquī yā, ni tu jíin i jíin tñūu i, ni tu jíin nahín i jnūhun ya, te súcuan cúu nde vijna. Achí tutu. ⁹Te suni ni cahān David:

Vico jeē casáha i, na cóo

nájñūhun iin trampa chí iin

xeyū,

návāha nihīn i castigo xeēn siquī

jeē castívi i casáha i cuēchi.

¹⁰Te ánuá i na ndúnee, nájñūhun

jeē tuá cúu coto i,

te na jécostíhí jñūndóho siquī i

ní cání.

Achí tutu.

Siquī jeē jnáma ya ñayuu

tāca gá nación

¹¹Núu súcuan te cájnūhun rí: ¿A tuá cúu cuiti ndívi ñayuu Israel nuū Yaā Dios jeē súcuan ni castívi i? Tú cuiti. Chi sa suhva jeē ní cacunīhni ni i, te sa ñayuu tāca gá nación ni canihīn tahu máá i jnūhun jeē jnáma ya i. Te yūcuán sáha tucu jeē ñayuu Israel condíhvī ni i jeē suni candíje máá i. ¹²Chi jeē ní castívi i, te sa ñayuu ní cáhnu ñayívi ní canihīn maá i jnūhun ya. Te jeē ní cajica yátá i, suu ni sáha jeē ní canihīn ñayuu tācá nación jnūhun ya. Núu súcuan te quívī jeē ndívicoo tucu ndíhi ñayuu Israel

ndaha ya, te ñayuu ñayīvi vīhyá gā quendōo ndetū i sáha ún.

¹³Te vijna te cáhán ri jíin róhó ñáyuu tǎcá nación jeē tu ní jíiní jnūhun ya. Chi ni tají Yaā Dios ruhū jeē scáca ri jnūhun nuū rohó ñáyuu tǎcá nación. Te ndúcú rí jeē na cuájnuhún ró jijnáhan ró jniñu sáha ri jeē nácani ri jnūhun ya. ¹⁴Chi cúní ri jeē jíin yúcuan te nacani ni sava jnáhan ri ñayuu Israel jeē suni candíje máá i, te jnama ya i. ¹⁵Chi jeē ni stóo ya ñayuu Israel, jeē yúcuan cúu jeē sa ñayuu ñayīvi ní sáha ya jeē ndívicoo i nuū jnúhun maní yā jíin i. Núu súcuan te quivī naquihin tucu ya ñayuu Israel, quivī ún suni vāha ndasí sáha ya jíin ñáyuu níi cáhnu ñayīví. Chi coo nájnūhun jeē natecu i jeē cúu i nájnūhun ndīyí. ¹⁶Te ñayuu Israel cásocō i nuū Yaā Dios pan jeē quénda xihna gā nuū ñujen, te súcuan stéén i jeē ndīhi un cúu cuenta yā. Te ñin yujnu, núu yñhi jeē cuenta yā cúu, te suu cúu nde yoho jíin ndé ndīhi ndaha. Te suni súcuan ñayuu Israel, yñhi cuenta i nuū yā, siquī jeē jíi i xihna ñúhún, ni quívicoo de ndaha ya.

¹⁷Chi ñayuu Israel cácuu i nájnūhun ndayújnu olivo váha, te sava ndaha un ní quendē. Te róhó ñáyuu tǎcá nación jeē tu jíiní jnūhun ya, cácuu ró nájnūhun ndayújnu olivo yucú, te ni nachuhun ya rohó núu ni quéndē ñayuu cácuu ndayújnu váha ún. Te nájnūhun inuú-ni cástáa ró ndúxi jíin cajin jeē véji nde yoho yújnu ún. ¹⁸Núu súcuan te ma sáha téyí ró maá ró nuū ñáyuu Israel jeē cácuu nájnūhun ndayújnu jeē ni quéndē.

Ma cutéyí ró, chi nucūhun ni rō jeē násūú jéé yoho stáa cajin nuū maá ró, chi sa máá ró stáa cajin jeē véji nde yoho.

¹⁹Te sanaa te cahān rō: Tú chi sava ndaha ni quendē návāha nachuhun ya ruhū nuū ni quéndē ún, achi rō. ²⁰Ndaā, te ni quendē i siquī jeē tu ní cácandíje i Cristo. Te róhó chi máni siquī jeē cácandíje ró, jeē yúcuan cúu jeē ni quívicoo ró lugar i. Te ma sándúxí ró maá ró núu súcuan, chi sa suhva conso iyo ró núu Yaā Dios. ²¹Chi tu ní íne cáhnu ni yā nuū maá ndaha jeē chíjñiñu, te suni súcuan ma cóne cáhnu ni yā nuū rō jijnáhan ró te núu stíví ró. ²²Núu súcuan te sáha vāha ro cuenta ndese vāha ni Yaā Dios jíin ndese xeēn ni yā. Chi ni nduxeēn ni yā jíin ñáyuu hebreo jeē ní castíví ún, te sa cundáhú ni yā rohó. Te cánuu cuiñi ñihin ro jíin jnúhun jeē váha ni yā jíin ró. Chi núu tuú, te suni quende yā rohó. ²³Te máá i, núu candíje tucu i, te nucōndee tucu i, chi máá Yaā Dios cuu nachuhun tucu ya i. ²⁴Núu súcuan te róhó ñáyuu tǎcá nación jeē tu ní jíiní jnūhun ya, ni quendē rō xiní yújnu olivo yucú, te ni nachuhun ya rohó xiní yujnu olivo váha, vēsú nasūú ndaha máá yujnu un cácuu ró. Te nagā ni cuu ñayuu hebreo jeē ma náchuhun ya i nuū ni quéndē i, chi cácuu i máá ndayújnu váha ún.

**Íin quivī te jnama ya ndīhi
ñayuu nación Israel**

²⁵Hermano, cúní ri jeē na jécūhun ni rō jijnáhan ró ndese íyó jnúhun yáha jéé ní yisāhí, návāha

ma cutéyí ró cani ni rō jeē ndichí xíní maá ró: Chi sava ñayuu Israel ni ndunihni ni i, te súcuan coo maá-ni nde quiví jínu candíje ñayuu táca nación jeē tu jíní jñuhun ya.

²⁶Te saá te jnama ya ndíhi ñayuu nación Israel, chi cáhán tutu ii:

Ichi ñuu rí Sión quiji Yaā jnáma ñayuu,

te sáha ya jeē tuá coo cuēchi nuū tāca yúcūn Jacob.

²⁷Te yāha cúu contrato jeē sándaā rí jíin i,

quiví jeē quénde ri cuēchi i jíjnáhan i, áchí Yaā Dios.

Achí tutu.

²⁸Chi ñayuu hebreo un ní nduu i nájnūhun enemigo Yaā Dios siquí jeē tu ní cácandíje i jñuhun jnáma ya i. Te jeē yúcuan te cuu cuitē núu jñuhun un núu tāca róhó. Te vésú súcuan te siquí jeē ní nacāji ya tāca jíí i jenahán, te cúndáhú gá ni yā i jeē ma stóo ya i ní cání. ²⁹Chi tu nácani yátá ni yā jeē cána ya ñayuu jíin jéē jéhe ya tahū i. ³⁰Te róhó jíjnáhan ró, suni ni cahíyo nihni ni rō nuū Yaā Dios nde saá. Te vijna jeē ní cacunihni ni maá ñayuu hebreo, te cúndáhú ni yā rohó.

³¹Te suni súcuan maá i, chi vésú cacunihni ni i vijna, te cundáhú tucu ni yā i, nájnūhun cúndáhú ni yā maá ró jíjnáhan ró. ³²Chi Yaā Dios ni sáha ya jeē ní quendóo ndívii ñayuu chíji jnúhun cúnihni ni i, návāha suni cuu cundáhú ni yā ndívii i.

³³Núu súcuan te náhán náā ni yō jeē yóhoyo cuehē jñuhun ndíchí iyó jíin Yaā Dios, te ndíhi cuiti jini yā. Te ni ma cúu cuiti castūhun yó ndese téé ni yā sáha ya tācá-ni, te

ma cánda cuiti yō jecūhun ni yō ndese cúu tāca jéē sáha maá yá.

³⁴Chi cáhán tutu ii: ¿Ndé iin ni jecūhun ni ndese jéni ni maá Jítoho yō? ¿Chí ndé iin ni steén nuū yā?

³⁵¿Ndé iin ni jéhe xihna gā nuū maá yá, návāha nachunaa yā nuū i?

³⁶Chi nde nuū maá yá vēji tāca jéē iyó, te maá yá ni sáha ndíhi, te jeē cúu maá yá cúu. Te na cáhán yō jeē yóhoyo luu cújéhnu Yaā Dios ní cání. Amén.

Jeē na cóo ndoo ánuá yō cuajníñu yó núu Yaā Dios

12 Núu súcuan te cáhán ndahú rí jíin ró jíjnáhan ró, hermano, jeē siquí jeē cúndáhú ni Yaā Dios yohó. Na sócō rō maá ró núu yā, coo ndoo coo ii rō cuajníñu ró núu yā, nájnūhun cúsií ni yā. Chi yāha cúu jeē chíñúhún ró yā nde jíin ini jíin ánuá rō. ²Te ma cáca ró jíin táca modo casáha ñayuu ñayívi yáha, chi sa na sáma ró modo cani ni rō, te ndujeé jéē níjnūnī rō. Te súcuan te cuu nacāji ró ndé-ni cúu jeē váha jeē níjnáhan ni Yaā Dios, jeē cúsií ni yā, jíin jéē íje ni rō jíin jnúhun ya.

³Te siquí jeē váha ni yā ni jéhe ya jniñu nácani ri jñuhun ya, jeē yúcuan cáhán rí jíin ndíhi ró jéé ma cání ni rō jeē váha ga ñayuu cúu ró núu cūhva jeē iyó ró. Chi ná iin ná iin ró na cání ndaā ni rō siquí maá ró, te ma scáa ga rō cani ni rō jeē váha ga ñayuu cúu ró vésú nuū cūhva jeē ni jéhe Yaā Dios fuerza ini rō cándíje ró. ⁴Chi cácuu yó nájnūhun iin yiqui cúñu jeē iyó cuéhē parte, te síin síin jéjníñu iin iin. ⁵Chi vésú iyó cuéhē yō, te

nájñuhun ñin-ni yiqui cúñu cúu yó jéē yíhi yó ndaha Cristo, chi ñin-ni ni nduu yó jíjnáhan yó.

⁶Te sñin sñin tahū ni jēhe Yaā Dios nuū yō jeē cuajñiñu yó núu yā, núu ndese ni nujnahan ni yā ni jēhe ya nuū ñin ñin yó. Núu súcuan te na cuajñiñu vāha yó jíjn táhū ún. Núu ni nihñin yō tahū jeē nácani yó jnúhun ya, te cánuú sáha yó ndé maá cúhva ni jēhe ya cándíje yó. ⁷Te núu ni nihñin yō tahū jeē chindéé ñáhán yó jnáhan yó, te na sáha yúcún yó. Te núu ni nihñin yō tahū jeē steén yō, te na cóndihvī ni yō steén yō. ⁸Te ñayuu jeē stihvī ni ñnga ñayuu, suni na sáha yúcún i. Te ñayuu jéhe nuū jnáhan, na cuáha i súcuan-ni. Te ñayuu ndíso jniñu, na ndácu vāha i jniñu. Te ñayuu jíto ndáhú ñayuu ndahú, na cúsiñ ni i sáha i.

Ndese cánuú squícu ñayuu cácadíje

⁹Te na cúndáhú ndije ni rō jnáhan ró, nasūu máá jéē cahán-ni ró. Te coto uhū rō jniñu néé, te condiquīn rō jniñu váha. ¹⁰Te cánuú coo manī rō jíjn jnáhan ró nájñuhun jéē manī rō jíjn ñani rō. Te nducú ró jeē quéndōo yíñúhún gá jnáhan ró vēsú maá ró.

¹¹Te ma cucúxí ró jíjn jniñu casáha ró. Chi jíjn ini jíjn ánuá rō condihvī ni rō cuajñiñu ró núu maá Jítoho yō.

¹²Te na cúsiñ ni rō jeē cáñuhun ni rō táca jéē váha jeē cóo. Te na cuándeyí ni rō núu ndóho ró jnúndóho. Te níni na cácan tahú rō.

¹³Te coto ndáhú ró ñayuu cácadíje núu cúmanī nuū i. Te cuáha núu ró vehe nuū ñayuu cájica.

¹⁴Te cacān tahú rō jehē ñayuu cájito xeēn rohó. Ma cahán ndevāha ro síquī i, chi sa cacān tahú rō jehē i.

¹⁵Te núu cúsiñ ni ñayuu, te suni na cúsiñ ni rō jíjn i. Te núu cúcuíhyá ni ñayuu, te suni na cúcuíhyá ni rō jíjn i.

¹⁶Na cóo ñnuú ni rō jíjn táca jnáhan ró. Te ma cundúxí ró, chi sa quijnáhan ró jíjn ñayuu núu ga. Ma cáni ni rō jeē ndichí xínī rō.

¹⁷Te ma nasáha ndevāha ró jíjn ni ñin ñayuu, núu ni sáha ndevāha i jíjn ró. Na cóndihvī ni rō sáha ró jniñu váha, jíto jínúú táca ñayuu.

¹⁸Te na cóndihvī ni rō coyūcu manī rō jíjn táca ñayuu, vēsú ndese cándāa máá i. ¹⁹Ñáni manī jijnáhan ró, ma nácuāha ró jéē ndútahū ñayuu casáha ndevāha jíjn ró, chi sa cuāha ró jnúhun jeē maá Yaā Dios cuāha ya castigo i. Chi cáhán tutu ii: Máá rí cuāha castigo i, máá rí nacuāha yāhu i, áchí Jítoho yō.

²⁰Te suni cáhán tutu: Tēe jíto uhū rohó, núu jí de sōco, te cuāha ró jéē cáji de. Te núu jíchí de, te cuāha ró jéē cóho de. Chi núu sáha ró súcuan, te cucanu de te nacani uhū ni de jeē ni jíto uhū de rōhó. ²¹Ma cuáha ró jnúhun jeē cúndeyí jniñu néé jíjn ró, chi sa jniñu váha na sáha ró návāha ndahvā jniñu néé.

13 Táca ñayuu na cuátáhú i nuū tohō cándiso jniñu ñuu. Chi ma cóo tēe cándiso jniñu te núu tu ní sáha máá Yaā Dios. Te tēe cándiso jniñu chi Yaā Dios ni tee jniñu síquī de. ²Te ñayuu jeē tu jétáhú núu tēe cándiso jniñu, núu súcuan te cúniñni ni i nuū jeē ní jeni Yaā Dios. Te ñayuu jeē cúniñni

ni, chi cuēchi sáha i, te nihīn i castigo. ³Chi tāca tée ndíso jniñu, nasūu jeē ndíso jniñu de jeē yūhú ñáyuu casáha jniñu váha, chi sa jeē yūhú ñáyuu casáha jniñu néé. Te núu cúní rō jeē ma cúxeēn tēe cándiso jniñu nuū rō, na sáha rō jniñu váha núu súcuan. Yūcuán na te cuajnúhún de rōhó. ⁴Chi jéjniñu Yaā Dios de jíjnáhan de, návaha coyūcu váha rō jíjnáhan rō. Te núu sáha rō jniñu néé, te sa yūhu rō, chi nasūu cáha-ni cúu jeē cándiso jniñu de stóho de ñayuu. Chi jéjniñu Yaā Dios de, návaha cuāha de castigo ñayuu casáha jniñu néé. ⁵Jeē yúcuan cánuú jeē cuatáhú rō núu tēe cándiso jniñu, te nasūu máni jeē ma níhín rō castigo, chi suni jeē tú na cuēchi coo ánuá rō. ⁶Te jeē yúcuan cúu jeē suni cájēhe rō xúhun núu tēe cándiso jniñu cuu jniñu ñuu. Chi jéjniñu Yaā Dios de, te máni jniñu yúcuan casáha de.

⁷Te chunaa rō ndihí jeē cátaū rō nuū tāca ñáyuu. Cuāha rō xúhun ñuu nuū tēe stútú xúhun ñuu, te cuāha rō xúhun renta nuū tēe stútú renta. Te na cóo respeto rō nuū ñáyuu cánuú coo respeto rō. Te na cóo yáñúhún rō nuū ñáyuu cánuú coo yáñúhún rō. ⁸Ma cótaū rō nuū ní iin. Te íyó iin jeē taú rō jeē ma tahndé cuiti, suu jeē ni cáhān Yaā Dios jeē cundáhú ni rō jnáhan rō. Chi ñayuu cundáhú ni jnáhan, je ni squícu i ndihí jeē ndácu ley yā. ⁹Chi súcuan ndácu ley jniñu: Ma cosíquí ndéē rō jnáhan rō, ma cáhni rō ndíyi, ma sacuíhna rō, ma sajnúhún rō, ma ndíyo ni rō jeē névaha jnáhan rō. Te tāca jnúhun yáha jíín táca gá jniñu ndácu ley,

ndihí-ni yíhi chiji jnúhun yáha: Cundáhú ni rō jnáhan rō nájnūhun cundáhú ni rō maá rō, áchí tutu.

¹⁰Te núu cundáhú ni yō jnáhan yó, te tu sáha yó ni iin jeē tu íyó váha nuū i. Núu súcuan te jeē cundáhú ni yō jnáhan yó, yúcuan cúu jeē squícu yó ní ley yā.

¹¹Súcuan sáha rō jíjnáhan rō, chi sáha rō cuenta jeē cuácuyajni quivī ndíji ya. Te ma cóo ga rō nájnūhun ñayuu quixí, jeē cúhuun ni rō. Chi vijna je ni cuyajni ga quivī jnáma ya yohó vésú quivī ní candíje yó jnúhun ya. ¹²Chi nájnūhun je yajni yáha jecuáā, te cuacundijin quivī jnáma ya yohó. Núu súcuan te na stóo yó jniñu jeē ni sáha yó núu néé, te na cúcutú yó jíín táca jniñu ndaā jeē caca yó jíín luz yā. ¹³Na cáca yáñúhún yó nájnūhun cánuú caca yó jíín luz yā. Ma nájini rō, ma sáha rō táca vico néé, ma cáca jnéni rō, ma sáha rō jniñu néé, ma cuajnáhan rō, ma cucuésún ni rō. ¹⁴Chi sa suhva cuiñi cutú rō jíín fuerza maá Jítoho yō Jesucristo, jeē ma cuáha ga rō jnúhun sáha rō jniñu cúní modo neé máá rō.

Ma cahán neé yó coto yó jnáhan yó

14 Cuatáhú rō ñayuu jeē ná tu ije jíín jnúhun ya, te ma tejnáhan rō jíín i síquī tāca jnúhun jeē síin jéni ni i jíín máá rō. ²Chi íyó ñáyuu jeē jéni ni i jeē cúu caji i ndinuū-ni. Te íyó ñáyuu jeē ná tu ije jíín jnúhun ya, te cájeni ni i jeē tú váha caji i cuñu, chi jeē ní casocō ñayuu nuū ídolo cúu. ³Te rōhó tēe jeē yéji ndinuū-ni, ma cahán rō coto rō tēe jeē tu yéji ndinuū. Te rōhó tēe jeē tu yéji

ndinuū, ma cahán rō coto ró tēe jeē yéji ndinuū. Chi Yaā Dios ni jetáhú yá tēe ún. ⁴Te rōhó, ¿ndé iin cúu ró jeē cahán neé ró jito ró mozo Yaā Dios? Chi núu vāha chí neé sáha de, te máá yá cúu jeē sándaā jíin de, nasūu máá ró. Te tuú chi cuiñi vāha de, chi mozo máá Jítoho yō cúu de, te cuu sáha ya jeē ma stívi de.

⁵Te suni íyó ñayuu jeē jéni ni jeē íi gā iin quivī vēsú inga quivī. Te inga ñayuu chi jéni ni i jeē inuū-ni cúu tāca quivī. Te tācá i na cúndaā vāha ni máá i siquī jeē jéni ni i. ⁶Chi tēe jeē nee i quivī, chíñúhún de máá Jítoho yō jeē sáha de súcuan. Te tēe jeē tu nee i quivī, suni chíñúhún de Jítoho yō jeē sáha de súcuan. Te tēe jeē yéji ndinuū-ni, chíñúhún de máá Jítoho yō jeē sáha de súcuan, chi nácuatáhú de nuū Yaā Dios. Te tēe jeē tu yéji ndinuū, suni chíñúhún de Jítoho yō jeē sáha de súcuan, te suni nácuatáhú de nuū yā.

⁷Chi ni iin yó tu técu yō jeē vāha máá-ni yó, te ni iin yó tu jíhí yō jeē cuní máá yó. ⁸Chi núu técu yō, te técu yō jeē cuajniñu yó núu máá Jítoho yō. Te núu cuu yō, te suni cuu yō siquī jeē cuní máá Jítoho yō. Núu súcuan te núu jeē cótecu yō chí jeē cuu yō, te yáhi yó ndaha Jítoho yō. ⁹Chi ni jihí Cristo te ni natecu yā, návāha cuu ya Jítoho nuū ñayuu ni jíhí jíin ñayuu técu.

¹⁰Te rōhó, ¿naun jéni neé ni rō jito ró jnáhan ró núu súcuan? ¿Te naun cújeé ni rō jito ró de? Chi tāca yó cuiñi yó yuhu mesa Cristo jeē sándaā yā jniñu yó. ¹¹Chi suhva yósó núu tútu i:

Jendaá ndije chi nuū máá rí
cuiñi yítí tāca ñayuu,

te ndihi i cahān jeē máá rí cúu
Yaā Dios, áhí máá Jítoho yō.

¹²Núu súcuan te ná iin ná iin yó nacuāha yo cuenta nuū Yaā Dios ndese jniñu ni casáha yó.

Ma sáha yó jeē quivī jnáhan yó cuēchi

¹³Te jeē yúcuan ma cahán neé gá yō coto yó jnáhan yó. Chi sa tee ni rō jeē ma sáha ró ni iin jniñu jeē sáha jeē stívi jnáhan ró te quivī i cuēchi. ¹⁴Te jíin rí jeē ni iin jeē ni sáha Yaā Dios, tu stívi ánuá yō. Chi súcuan ni cucáhnu vāha ni rí siquī jeē candíje ri Jítoho yō Jesús. Te núu iin ñayuu jéni ni i jeē íyó jéé stívi ánuá i, yūcuán na te súcuan sáha un jíin máá i. ¹⁵Te núu jnáhan ró tu cúvāha ni de jeē yéji rō cūñu ni casocō ñayuu nuū ídolo, chi jéni ni de jeē stívi un ánuá rō, núu súcuan te tu cúndáhú ni rō de jeē sáha ró súcuan. Coto má snáā rō anuá jnáhan ró síquī jeē yéji rō iin jeē jéni ni de jeē cuēchi cúu. Chi suni jehē máá de ni jihí Cristo.

¹⁶Ma sáha ró jniñu jeē cahán i siquī, vēsú jiní máá ró jeē íyó vāha. ¹⁷Chi jeē ndácu Yaā Dios jniñu nuū yō, nasūu síquī ndese caji yō coho yó cúu, chi sa suhva siquī jeē na sáha yó jniñu ndaā, te coyūcu mání yō jíin jnáhan yó, te cusíi ni yō sáha Espíritu Santo. ¹⁸Te ñayuu jeē súcuan jéjníñu nuū Cristo, chí cúsíi ni Yaā Dios jíin i, te suni cájejnúhún ñayuu i.

¹⁹Núu súcuan te na cóndihvī ni yō coyūcu mání yō, návāha jíin yúcuan chindéé ñájnáhan yó ije yó jíin jnúhun ya. ²⁰Te ma cuáha ró jnúhun jeē ndeyu yéji rō snáā jniñu

ni sáha Yaā Dios jíin jnáhan ró. Chi iyó ndoo ndije ndíhi jeē yéji yō, te vēsú súcuan te tú vāha jeē yéji rō ndeyu jeē sáha jíin jnáhan ró jéē caji de jeē jéni ni de jeē cuēchi cúu. ²¹Vāha ga ma caji rō cūñu, ni ma cóho ró vino, te ni iin ma sáha ró jéē stívi ánuá jnáhan ró, te quīvi de cuēchi, te caca yátá de nuū jnúhun cándíje de. ²²Te núu cándíje ró jéē tú na vé sáha jeē yéji rō, te súcuan na cándíje máa-ni ró núu Yaā Dios. Te nacā ndetū tēe jeē tu sáha jíin ánuá de jeē cuēchi cúu núu caji de coho de. ²³Te tēe yéji iin jeē jéni ni de sanaa te stívi ánuá de, núu súcuan te sáha de cuēchi, chi tu cándíje de jeē iyó vāha jeē yéji de. Chi tāca jéē sáha yó, núu tu cándíje yó jéē iyó vāha, te cuēchi cúu.

Jeē na sáha yó jéē cúsiī ni jnáhan yó

15 Te yóhó jéē ni ije yó jíin jnúhun ya, cánuú condito yó ñáyuu jeē ná tu ije jíin jnúhun ya, návāha candíje vāha i. Te ma sáha yó jéē maá-ni yó cusíi ni. ²Chi ná iin ná iin yó na sáha yó jéē cúsiī ni jnáhan yó, návāha quendōo vāha i te ije i jíin jnúhun cándíje i. ³Chi ni Cristo, tu ní sáha ya jeē cúsiī ni maá yá, chi sa suhva jeē cúsiī ni Tatá yā. Chi suhva cáhán tutu iī: Tāca jnúhun ndevāha jeē cácahān ndevāha ñáyuu siquī ní, ni ndīvi siquī maá ná, áchí Cristo jíin Tatá yā. ⁴Chi tāca jnúhun jeē ni jécósō nuū tútu iī nde jenahán, chi ni jécósō návāha stéén nuū yō, te nihīn yō jnúhun jeē sáha jeē cuandeyí ni yō te ndusiī ni yō. Te súcuan te cocuhun ni yō tāca jéē vāha jeē cóo. ⁵Te máá Yaā Dios

jeē jéhe jnúhun cuandeyí ni jíin jnúhun ndúsiī ni, na sáha ya jeē cóo inuú ni rō, návāhūhun cúní Cristo Jesús. ⁶Te súcuan te iin-ni coo ró te inuú-ni cuu cahān rō jeē yóhō vāha Yaā cúu Yaā Dios, Tatá Jitoho yō Jesucristo.

**Jeē ni jítē jnúhun vāha ya
nuū ñáyuu tācá nación**

⁷Núu súcuan te cuatáhú ró tāca jnáhan ró, návāhūhun ni jetáhú Cristo yohó, návāha cuni ñáyuu jeē luu cújéhnu Yaā Dios. ⁸Chi cáhán rī jeē ní quiji Cristo Jesús, ni sáha ya tācá jniñu jeē quéndōo vāha ñáyuu hebreo, návāha cundaā tāca jnúhun jeē ni jéjñūhun Yaā Dios nuū tāca jíi i. Te súcuan ni steén Cristo jeē squícu Yaā Dios tāca jéē ni jéjñūhun ya. ⁹Te suni ni quiji ya návāha ñáyuu tācá nación jeē tu jíin jnúhun ya, cahān i jeē yóhō vāha ni Yaā Dios jeē cundáhú ni yā i. Chi suhva cáhán tutu iī:

Núu súcuan te cahān na jéē yóhō vāha ni ní, cuni ñáyuu tācá nación,
te cata ná yaa jeē chiñúhún ná nihín.

¹⁰Te cáhán tucu tutu iī:

Róhó ñáyuu tācá nación, inuú na cúsiī ni rō jíin ñáyuu maá yá.

¹¹Te cáhán tucu:

Róhó ñáyuu tācá nación, na cáhán rō jeē yóhō vāha ni Jitoho yō Yaā Dios,
te róhó ñáyuu tācá-ni ñuu,
suni na cáhán rō jeē yóhō cújéhnu ya.

¹²Te suni ni tee Isaiás jnúhun yáha:

Nuū yúcuñ Isai quiji iin jeē cújéhnu,

te ndacu ya jniñu nuū ñayuu
tācá nación.

Te ñayuu ún chi cocuhun ni i
tāca jéē sāha ya.

Achí tutu.

¹³Te máa Yaā Dios jeē sāha jeē
cāñuhun ni yō tāca jéē váha jeē
coo, na sāha ya jeē cóo siī ndasí ni
rō jíin jéē cóo ndeyí ni rō siquī jeē
cācandíje nihin ró yá. Te súcuan te
cocuhun teyí gá ni rō tāca jéē váha
jeē coo, sāha poder maá Espíritu
Santo.

¹⁴Ñānī mánī, cúcáhnū ni rī jeē
váha ndasí cándihvī ni rō jíin jniñu
váha, te vāha ndasí cájecūhun ni
rō, te cúu stíhvī jnáhan ni rō. ¹⁵Te
ni jeni ni rī jeē tee ri carta yáha
cáhān cají rí jíin ró jíjnáhan ró,
návāha víhyá gā na cócuhun ni rō
tāca jnúhun yáha. Chi súcuan sāha
ri siquī jeē váha ni Yaā Dios te ni
jēhe ya jniñu nuū rī ¹⁶jeē jejníñu ri
nuū Jesucristo, jeē nácani ri jnúhun
nuū ñayuu tācá nación jeē tu jíin
jnúhun ya. Te nácani ri jnúhun
vāha Yaā Dios nuū i jeē jnáma ya i.
Súcuan sāha ri návāha ñayuu tācá
nación, cuu squívī ri i ndaha ya jeē
cúu i nájnūhun ñin jeē socó rī nuū
yā jeē cúsiī ni yā jíin. Chi ni sāha
Espíritu Santo jeē iyó ndoo íyó íi i
nuū yā.

¹⁷Núu súcuan te siquī jeē candíje
ri Cristo Jesús, te cúsiī ni rī jeē
jejníñu vāha ri nuū Yaā Dios. ¹⁸Chi
ma cúu cahān rī siquī jniñu cásáha
inga tēe, chi máa-ni siquī ndese ni
jejníñu Cristo ruhū jeē sāha ri jeē
ñayuu tācá nación tu ní jíin jnúhun
Yaā Dios, vijna jétáhú i nuū yā. Chi
súcuan ni cuu jíin jnúhun ni cahān
rī jíin jniñu ni sāha ri. ¹⁹Chi ni sāha

ri jniñu jéhnū ndíso poder jeē steén
jeē cujéhnū ya, te ni iyo poder
Espíritu Santo jíin rí. Te súcuan ni
nacani ndíhi ri jnúhun ndese jnáma
Cristo ñayuu. Te ni nacani ri nde
ñuu Jerusalén, jíin ndíhi tācá ñuu,
jíin nde níí región Ilírico. ²⁰Súcuan
cúu jeē ní condíhvī ni rī ni nacani
ri jnúhun jeē jnáma ya ñayuu. Te
ni jehēn rī nuū ñayuu jeē ná tu
cuni jnúhun Cristo, chi tu ní cúní rī
nacani ri nuū ñayuu jeē jé ni jini i
ni canacani inga tēe. ²¹Chi sa suhva
ni sāha ri nájnūhun cáhān tutu ii:

Tāca ñayuu jeē tu ní quíji

jnúhun ya nuū i, vijna chi
cuni i jnúhun ya,

te tāca ñayuu jeē tu ní jíin cuiti

jnúhun ya, vijna chi jecūhun
ni i.

Achí tutu.

Jeē ñúhun ni Pablo jeē quihín de Roma

²²Te jeē yúcuan cúu jeē cuehē jínu
ni cujnéñu ri, te tu ní cúu jecondēhe
rí rohó jíjnáhan ró. ²³Te vijna chi ni
ndíhi jniñu ri níí cáhnu tācá región
ndañúu yáha. Te je ni cuu cuehē
cuiyā jeē cúní rī jeē rī nuū rō. ²⁴Núu
súcuan te ñúhun ni rī jecondēhe
rí rohó jíjnáhan ró núu na yáha ri
quihín rī España. Te ñúhun ni rī jeē
núu je ni cusíi ni rī jeē ní jito jnáhan
yó, yúcuán na te chindéé ñáhán ró
ruhū jeē quihín gā rī. ²⁵Te xíhna gā
na quíhín rī ñuu Jerusalén quindēca
ri xúhún cuu hermano cáyūcu
yúcuan. ²⁶Chi ñayuu Macedonia jíin
Acaya ni cajeni ni i jeē cáquin i xúhun
quíhín nuū hermano cándoho ndáhú
ñuu Jerusalén. ²⁷Chi súcuan ni cacusiī
ni i ni casáha i. Te íyó váha jeē

súcuan, chi máá i jeē cácuu i ñayuu tāca gá nación, táú i jeē sáha vāha i nuū ñáyuu hebreo un. Chi ñayuu hebreo ni casáha jeē ní quiji jñuhun Yaā Dios nuū i jeē quéndōo vāha ánuá i sáha. Jeē yúcuan cánuú jéē chindéé ñáhán i ñayuu hebreo cácanđije jíin ndajniñu ñayivi yáha. ²⁸Núu súcuan te jeē jínu jniñu yáha jéē quíndēca ri xūhun yáha nuū i, yūcuán na te jecondēhe rí rohó jíjnáhan ró jéē yáha ri quihñ rí España. ²⁹Te jíni vāha ri jeē quiví jíni rí nuū rō, te vāha ndasí quendōo ró jéē nacani ga rí jñuhun vāha Cristo nuū rō.

³⁰Hermano jijnáhan ró, cáhán ndahú rí jíin ró jeē chindéé ñáhán ró ruhū cacān tahú rō jehē rí nuū Yaā Dios siquí jniñu ndúcú ndeyí rí. Súcuan sáha ró síquí jeē candíje yó Jítoho yō Jesucristo, jíin síquí jeē cundáhú ni yō jnáhan yó sáha máá Espíritu. ³¹Te cacān tahú rō jeē na cácu ri nuū téē región Judea jeē tu cácanđije, jíin jéē na cúsiñ ni táca hermano ñuu Jerusalén jeē quíndēca ri xūhun yáha cuu de.

³²Te súcuan te núu cúní Yaā Dios te jecondēhe rí rohó jíjnáhan ró, te cusíñ ni yō, te nanihñ ni rí jeē condee rí jíin ró. ³³Te máá Yaā Dios jeē jéhe jñuhun ndeyí sñ ni, na cóo ya jíin ró jijnáhan ró. Amén.

Jeē cahán Pablo jeē sándeýí ni i

16 Te vijna te cáhán rí jíin ró jijnáhan ró jéē na chindéé ñáhán ró hermana Febe, chi cúu ña ñahan jéjñiñu jeē síquí jnúhun ya nuū ñáyuu cácanđije ñuu Cencrea. ²Te cuatáhú ró ña nájnūhun cúní máá Jítoho yō, chi súcuan cánuú sáha hermano cácanđije. Te

chindéé ñáhán ró ña na-ni vé cúu jeē jíni ñúhún ña, chi súcuan ni chindéé ñáhán máá ña cuehē ñayuu, te suni nde ruhū.

³Cahán rō jíin Priscila jíin Aquila jeē sándeýí ni ndíndúú de, áchí rí, chi cáchindéé ñájnáhan de jíin rí síquí jniñu Cristo Jesús. ⁴Chi ná ni iyo jñúndóho jeē cuu rí nuú, te ni cachundeyí ni de ni canducú de scácu de ruhū, vēsú suni cuu maá de núú. Te nácuatáhú rí nuū ndíndúú de, te nasūu máá-ni ruhū, chi suni tāca grupo ñayuu cácanđije táca nación. ⁵Te suni cahán rō jíin ñáyuu cácanđije ndútútú vehe de, sándeýí ni i, áchí rí. Te cahán rō jeē sándeýí ni Epeneto, téē maní rí jíin. Chi ñuu Acaya, máá de cúu jeē ní candíje xihna gā nuū Cristo. ⁶Suni cahán rō jeē sándeýí ni María, ñahan jeē ní jejniñu ndasí jeē síquí jnúhun ya mēhñu ró jijnáhan ró. ⁷Te cahán rō jeē sándeýí ni Andrónico jíin Junias, téē cácuu jnáhan ñuu rí jeē ní cahiñ jíin rí vecāa. Te táca apóstol chi cájejnúhún de ndíndúú téē jíñá, te xihna gā de ni cacandíje Cristo vēsú máá rí.

⁸Cahán rō jeē sándeýí ni Amplias, téē maní rí jíin, chi cándíje de Jítoho yō. ⁹Te cahán rō jeē sándeýí ni Urbano, téē chindéé ñájnáhan jíin yó síquí jniñu Cristo Jesús, te suni súcuan Estaquis, téē jeē maní rí jíin. ¹⁰Suni cahán rō jeē sándeýí ni Apeles, téē jeē ni stéén jeē candíje vāha de Cristo, te suni súcuan cahán rō jíin ñáyuu vehe Aristóbulo. ¹¹Cahán rō jeē sándeýí ni Herodión, téē cúu jnáhan ñuu rí. Te suni súcuan ñayuu vehe Narciso jeē cácanđije máá Jítoho yō. ¹²Te suni cahán rō jeē sándeýí ni

Trifena jíin Trifosa, ñahan cásájniñu siquī jnúhun máá Jítóho yō. Te suni sándeýí ni Pérsida, hermana jeē maní yō jíin, chi suni ni sájniñu ndasí ña siquī jnúhun Jítóho yō. ¹³Te cahān rō jeē sándeýí ni Rufo, tēe cajejnúhún ñáyuu jeē vāha cándíje de máá Jítóho yō. Te suni súcuan cahān rō jíin náná de, te máá ña suni ni jito ña ruhū nájnūhun jeē naná rī cúu ña. ¹⁴Te cahān rō jeē sándeýí ni Asíncrito jíin Flegonte jíin Hermas jíin Patrobas jíin Hermes jíin táca hermano jeē cáyūcu jíin de. ¹⁵Te suni súcuan Filólogo jíin Julia jíin Nereo jíin cuáha de, jíin Olímipas jíin ndíhi hermano cácaandíje cáyūcu jíin de jíināhan de.

¹⁶Te jeē cahán tāca rō jíin jnáhan rō, te yáñúhún techūhu rō ndaha i. Te tāca grupo ñayuu cácaandíje nuū Cristo, cáhán i jeē na sándeýí ni rō.

¹⁷Te cáhán ndahú rí jíin rō, hermano jijnáhan rō, jēe cóto rō máá rō nuū ñáyuu cútucu ni te ndúcú stívi jnáhan jíin jnúhun tu quíjnáhan jíin jēe ní cacutúhva rō. Te cujiyo rō núu i jíināhan i. ¹⁸Chi ñayuu súcuan, tu jéjníñu i nuū Jítóho yō Jesucristo, chi máni ndíhvi ni i siquī jeē cáji i. Te yóhyo ndúxí i jíin jnúhun cácahān i, te súcuan stáhú i ñayuu jeē tu jíní vāha. ¹⁹Te máá rō jijnáhan rō, chi je cájini ndíhi ñayuu ndese vāha cájetáhú rō nuū yā, te jeē yúcuan cúsiñi ni rī. Te cúní rí jeē cóo listo vāha rō sáha rō jniñu vāha, te ma sáha rō jniñu néé. ²⁰Te máá Yaā Dios jeē jéhe jnúhun ndeyí sñi ni, yachí sáha ya jeē cúndeýí rō siquī jexeén jeē cúu Satanás. Te ñúhun ni rī jeē Jítóho yō Jesucristo na sáha ya jeē vāha róhó jíināhan rō.

²¹Sándeýí ni rō jijnáhan rō, áchí Timoteo, tēe chindéé ñáhán jíin rí siquī jnúhun ya. Te suni súcuan cácahān jnáhan ñuu rí Lucio jíin Jasón jíin Sosípater.

²²Te ruhū jeē naní Tercio, jeē tēe rí carta yáha jēe cahán Pablo, suni cáhán rí jeē sándeýí ni rō jeē cácaandíje rō Jítóho yō.

²³Te Gayo, tēe ni jēhe núu vehe ndéé rúhú Pablo, cáhán de jeē sándeýí ni rō jijnáhan rō. Te suni jéhe núu de vehe nuū tāca ñáyuu cácaandíje. Te suni súcuan cáhán Erasto, tēe cúu tesorero ñuu yáha, te suni súcuan cáhán hermano Cuarto.

²⁴Te ñúhun ni rī jeē máá Jítóho yō Jesucristo, na sáha ya jeē vāha róhó jíināhan rō. Amén.

Jnúhun sándíhi jéé cahán jeē yóhyo cújéhnu ya

²⁵Te vijna na cáhán yō jeē yóhyo cújéhnu Yaā Dios. Chi máá yá cuu sáha jeē cuñiñi nihin ga rō jijnáhan rō jíin jnúhun jnáma ya rohó jeē nácani rí, jíin jnúhun Jesucristo jeē steén rí. Chi súcuan ni steén Yaā Dios jnúhun sáhi yá, jeē ní yisáhi níí cáni nde ná tu jecōo ñayívi. ²⁶Te vijna te je ni nane cáji. Chi jíin tútu ii jeē ní catee tēe ni canacani jnúhun ya, ni jitē núu jnúhun sáhi yáha nuū ñáyuu táca nación, návāha candíje i te cuatáhú i. Chi Yaā Dios jeē técu níí cáni, súcuan ni ndacu ya jniñu.

²⁷Te níí cáni na cáhán yō jeē yóhyo cújéhnu Yaā Dios siquī jniñu ní sáha ya jeē jíin Jesucristo. Chi máá iin-ni ya iyó te yóhyo ndíchí yá. Súcuan na cóo. Amén.